



गालील समुन्द्र

मर्कूस

ब्रेक्ब मुर: एको किताब ब्रेक्ब मुर मर्कूस बाक्ब। मेकोमी आंम आ पर्वम मर्कूस १४:५१-५२ ब्रेक्बो बाक्ब। मेको आ यहूदी नें यूहन्ना बाक्त, मेको आ रोमी नें चहिं मर्कूस बाक्त। मर्कूस बारनाबास आ याच बाक्त। मेको पावल नु बारनाबास काथा लमा बाक्त। तन्न मेको आस कली प्रोइशशा, यरूसलेम लेम्माक्त। प्रेरित १३:५, १३ नोले पवलम मेको आ पर्वम रिम्शो लोव्र पवा बाक्त। मेको कली लेंशा, रोम सहरम वारच पचा कली ब्रेक्बो बाक्त। २तिमोथी ४:११ मर्कूसमी पत्रुस कली वारच पा, आ शेंतीक लोव्र रोमी लोव्रम सेला बाक्त। मिनु मेको लोव्र मसाम्चा कली नेल्ल ब्रेक्ता बाक्त।

गेना ब्रेक्बो: मर्कूस ६३-६४ ए. डी. रोम सहर जाक्माक्त। मेना थमा सुइक्ब आन कली रोम डा सिजर नेरो आ पतीकेमी खेदा पचा गोव्रमे बाक्त। मिनु मेको किताब ६४-६५ ए. डी. मेर खोदेशो ब्रेक्बो बाक्ब। तन्न ७० ए. डी. क्येडा डोंइती दुम्चा माल्ताक्व। मारदे हना यरूसलेम सहर कली खतम सेल्ल्तीके आ पर्वम मारिइ मब्रेक्बो बाक्त।

मारदे ब्रेक्बो: मर्कूसमी आ किताबम येसु आ पशो छक लाक्चा डा गेय आ पर्वम शुश ब्रेक्ताक्व। मेको पत्रुस आ शेंतीक लोव्र रे बाक्ब। येसु आ गेय डा नेल्ल क्येडा ठेयब लोव्र बाक्नीम। येसु परमप्रभु यावे आ गेय पाइब दुम्तीके किताब नेल्लेम कोइशो बाक्ब, देंशो बाक्ब। मर्कूस १०:४५

ब्वाक्कुम खुम्शा गुंडब यूहन्ना

मत्ती ३:१-१२; लूका ३:१-१८;

यूहन्ना १:१६-२७

१ एको परमप्रभु यावे आ तौ येसु ख्रीस्त आ पबम ब्रेकशो ग्येरपाइक्ब लोत्र बाक्ब। मेको लोत्र दोदेशो पा गोइब देशा हना, २ परमप्रभु यावे आ लोत्र पाइब यसैयामी ब्रेकशो लोत्रमी मार ब्रेकशो बाक्त देशा हना “नेनो, इ डोंडती आं लोत्र पाइब सोइक्नुड। मेकोमी इ लां थेल्ब। मत्ती ११:१० ३ गोरशो रागीमी सेंदा कामी ‘प्रभु आ लां थेलीने। आ गाक्तीके लां फुल्लु ग्रीक्शा थेलीने’ देशो नेंसीब” दे ब्रेकशो बाक्ब। मलाकी ३:१; यसैया ४०:३ ४ ब्वाक्कुम खुम्शा गुंडब यूहन्ना गोरशो रागीम गूशा, मुर आन कली “इन पाप क्याम्चा कली इन थुं परमप्रभु यावे गे लेत्तीने। आंइ थुं लेत्ताक्क दे कोइंचा कली ब्वाक्कुम खुम्शा गुंडपांडसीने” दे लोत्र पाइक्बाक्माक्त। ५ मिनू यहूदीया रागी नु यरूसलेम सहर डा मुर नेल्ल मेकेर जाक्शा, आन पाप शोत्रशा, यूहन्ना रे पा यर्दन खोलाम खुम्शा गुंडचा पुंडसमा बाक्त।

६ यूहन्नामी दलओठ आ चां के प्रोवशो वा फेक्बाक्माक्त। कुशुल के किप्शुर किप्बाक्माक्त। मिनू सल्हा माले ब्वशा नु रोका खुदो जशा बाक्बाक्माक्त। ७ मिनू मुर आन कली “आं नोले जाक्ब आं क्येडा सक्ति पाइश्शो बाक्ब। गो मेको आ डोंडती बाप्शा, आ जुत्ता प्रुइक्चा लायो मशिरनुड। ८ गो इन कली ब्वाक्कुम खुम्शा गुंडताक्नी। मेकोमी चहिं इन कली परमप्रभु यावे आ सोक्तीमी खुम्ब” दे मुर आन कली शेंना शेंन बाक्बाक्माक्त।

येसु ब्वाक्कुम खुम्शा गुंडचा पुंडसीशो

मत्ती ३:१३-४:११; लूका ३:२१-२२;

लूका ४:१-१३; यूहन्ना १:३२-३४

९ मेना येसु गालील रागी डा नासरथ सहर रे गाक्शा, यूहन्ना आ बाक्तीकेमी जाक्माक्त। मिनू यूहन्ना रे पा यर्दन खोलामी ब्वाक्कुम खुम्शा गुंडपांडसे बाक्त। लूका २:५१ १० मिनू ब्वाक्कुमी गुम्शा गूमेनु, सरीड रोक्सीशा, परमप्रभु यावे आ सोक्त परवा खोदेशो पा यिशा, आ तारी जुक्शो तवा बाक्त। ११ मिनू सरीड रे “आं दाक्शो तौ नवे। इ कली तशा थाम्पा ग्येरसीनुड” देशो सेंदा नेंसे बाक्त। मर्कुस ६:७

येसु थुं थाम्चा पुंडसीशो

१२ मिनू नोले परमप्रभु यावे आ सोक्तीमी येसु कली गोरशो रागीम लदा बाक्त। १३ मिनू गोरशो रागीम ४० नाक्त सम्म बाक्माक्त। मेकेर बाक्मेनु, सैतान रे पा थुं थाम्चा पुंडसे बाक्त। मेको गोरशो रागी डा जन्तुपुकी नु बाक्माक्त। परमप्रभु यावे आ स्वर्ग डा गेय पाइबपुकीमी मेको कली वारच पामे बाक्त।

येसुम परमप्रभु आ लोत्र नेंपाइश्शो

१४ यूहन्ना जेल्खानमी चोक्चा पुंडसे नोले, येसुमी गालील रागीमी परमप्रभु यावे आ ग्येरपाइक्ब लोत्र नेंपाइक्ना पाइक्न गाक्माक्त। १५ मेकोमी “परमप्रभु यावे आ देशो नाक्त जाक्त। आ राज्य इन नेक्था जाक्शो बाक्ब। इन थुं परमप्रभु यावे गे लेश्शा, आ ग्येरपाइक्ब लोत्र थमा सुतीने” दे नेंपाइक्ना पाइक्न गाक्माक्त।

गलाती ४:४

येसुमी शेंसीब आन कली ब्रेशो

मती ४:१८-२२; लूका ५:१-११;

यूहन्ना १:३५-५१

१६मिनु येसु गालील समुन्द्र आ नेक्था हिरसेनु, सिमोन नु आ लोकब अन्द्रीयास ग्याइल आप्शा, डांइ रेन्ना रेन्न बाक्शो तवा बाक्त। मेको निक्शी डांइ रेण्व बाक्सा बाक्त। १७मिनु येसुमी मेको आस कली “आं नोले खोइय्थीसी। मिनु मुर आन कली रेण्व सेलनन्सी” दे माइक्सी बाक्त। १८मिनु ग्याइल थु था प्रोइशा, आ नोले खोइशा गाक्सा बाक्त।

१९मिनु इच्ची आइक्ची लशा, जब्दी आ तौ निक्शी याकूब नु यूहन्ना वोबु आस कली डोंगाम बाक्शा, गाक्शो ग्याइल प्रोव्रना प्रोव्रन पशो ताम्सी बाक्त। २०मिनु मेको आस कली यो ब्रेत्तीम्सी बाक्त। मिनु आस आफ जब्दी नु गेय पाइब आन कली प्रोइशा, आ नोले खोदसे बाक्त।

वोल कली गुंडशो

मती ८:१४-१७; लूका ४:३१-४४

२१मिनु कापेरनाउम सहरम जाक्दीम्मा बाक्त। मिनु नाइक्तीक नाक्त येसुमी गुम्तीक खिं लशा, मुर आन कली शेंदीमी बाक्त। २२मेको आ शेंशो नेंशा, नेल्ल छक लाक्मा बाक्त। मारदे हना सास्त्री आन लोव्र खोदेशो ममाइ। अधिकार पाइशो लोव्र पा शेंदीमी बाक्त। सास्त्री य्यूदी आन कली परमप्रभु यावे आ अरेशो लोव्र शेंब बाक्शो बाक्तेक्म। मती ७:२८-२९ २३मिनु मेको गुम्तीक खिंमी ग्रांग्रा दिचा डा वोलमी सुम्शो मुर का बाक्माक्त। २४मिनु मेको वाइ ब्रेशा “ए नासरथ डा येसु, मार पमुया डा? आंइ कली खतम पोक्थ जाक्नी? गो इन कली

तुइक्नीकी। गे परमप्रभु यावे आ योव्रशो ननी” देंमा बाक्त। मर्कूस ५:७ २५मिनु येसुमी वोल कली “सिक्सी पावो। मिनु गूडो” दे हुइक्ता बाक्त। मर्कूस ६:२६ २६मिनु ग्रांग्रा दिचा डा वोलमी मुर कली दिड खोल्शा, वाइ ब्रेशा गूमाक्त। २७मोदुम्शो तशा, मुरपुकी छक लाक्शा “मार बाक्म माइ? नक शेंतीक लोव्र बाक्म कोर में? अधिकार पाइशो लोव्र पवानु, ग्रांग्रा दिचा डा वोलम लायो टीबाक्तेक्म” देंमुमा बाक्त। २८मिनु गालील रागीमी तेइ तेइ येसु आ पबंम लोव्र ब्रना ब्रन लमाक्त।

रोइ पाइब आन कली सापाइशो

२९मिनु वोल कली गुंडशा, येसु गुम्तीक खिं रे सिमोन नु अन्द्रीयास वोबु आस खिंम जाक्दीम्माक्त। मिनु याकूब नु यूहन्ना यो येसु नु काथा बाक्सा बाक्त। ३०मिनु जाक्दीम्मानु, सिमोन आ शिमी जरो पा गोल्शो बाक्माक्त। मिनु येसु कली तुइक्पदमे बाक्त। ३१मिनु येसु मेको आ नेक्था लशा, आ गुइ ग्याइशो पोक्गा बाक्त। मोपा पोक्गानु, जरो जाम्माक्त। मिनु सेस दुम्शा, मेको आन कली मान पा थुल्मी बाक्त।

३२मिनु नां रिक्मेनु, मेको सहर डा मुरपुकीमी रोइ पशो नु वोलम सुम्शो मुर नेल्ल आन कली चाक्मे बाक्त। ३३सहर डा मुर नेल्ल खिं डा लाप्चो आ डोंइती खुम्समा बाक्त। ३४मिनु येसुमी रोइ पशो शुश मुर आन कली सापदा बाक्त। मिनु शुश वोल आन कली हुइशो खेरमी बाक्त। वोल आन कली लोव्र पचा मगेवा बाक्त। मारदे हना वोलपुकीमी येसु कली तुइशो बाक्तेक्म। प्रेरित १६:१७-१८

३५ आ दीसा सुनी नां मसोवथु, येसु बोकशा मेकेर रे गाकशा, सुइ मबाक्तीकेमी जाकदीशशा, प्रार्थना पवा बाक्त।

मत्ती १४:२३; मत्ती २६:३६; लूका ५:१६; लूका ११:१

३६ मिनु सिमोन नु मेको नु बाकबपुकीमी येसु कली माल्मे बाक्त। ३७ मिनु ग्रुशा, येसु कली “मुर नेल्लेमी इन कली माल्शो बाक्नीम” दे मदमे बाक्त। ३८ मिनु येसुमी “मेकेर रे लशा, एर ओंथ गाउं सहर हिरशा लय। मारदे हना मेकेर यो शेंथ जाक्ती” देंमाक्त। ३९ मिनु गालील रागी नेल्ल हिरशा, ग्रुम्तीक खिंमी शेंबाक्माक्त। वोल आन कली खेरबाक्माक्त।

कोर पाइब कली सापाइशशो

मत्ती ८:२-४; लूका ५:१२-१६

४० मिनु कोर पाइब का जाकशा, येसु आ डोंइती आ पोकच थेकशा “सापाइक्चा दाक्ताक्नी हना, आं कली सापाइक्ने चाप्नीनी” दे सेउ पशा पुना बाक्त। ४१ मिनु येसुमी शिशी पा आ गुइ दिंशा, कोर पाइब कली थिशा “गो सापाइक्चा दाक्नुड। साडो” देंमाक्त। ४२ मो देंमेनु, कोर सामाक्त। ४३ मिनु येसुमी “सुइ कली मशेंदो। मर्कुस ३:१२ ४४ चढेब आ डोंइती लशा, इ साशो रां कोइदो। मिनु मुर नेल्ल आन कली ‘गो साती’ दे तुइक्पाइक्चा कली मोसाम देशो खोदेशो पा चढेवो” दे माइशशा सोइक्ता बाक्त। मर्कुस ७:३६; लेवी १४:२-३२ ४५ मिनु साशो मुर मेकेर लशा, दोपा सामे, मेको लोव्र तेइ तेइ ब्रपदा बाक्त। मोदेशो लोव्र ब्रतीके येसु सहर सहरमी गाक्ने मचबा बाक्त। मोपतीके शुश मुर मबाक्तीकेमी बाक्माक्त। तन्न मुरपुकी तेइ तेइ रे जाक्बाक्मा बाक्त।

गुइ खोइली मदुक्ब कली सापाइशशो

मत्ती ६:१-८; लूका ५:१७-२६; यूहन्ना १:१६-२७

२ नाक्त का निक्शी नोले कापेरनाउम लेम्माक्त। मिनु मुरपुकीमी “येसु खिंमी बाक्ब” दे तुइक्तमे बाक्त। २ मिनु मेकेर शुश मुर खुम्सीशा, लाप्चोमी यो मुरपुकी देल्मा बाक्त। मिनु येसुमी मेको आन कली परमप्रभु यावे आ लोव्र शेंदीमी बाक्त। ३ मिनु ४ जना मुरपुकीमी गुइ खोइल मदुक्ब मुर का कुरशा चाक्मे बाक्त। ४ शुश मुर देल्तीके येसु आ डोंइती चाक्दीन्ने मचाप्मे बाक्त। मिनु खिं डोइशशा, फुल्लु याक्शा, ओंइतीके सेल्मे बाक्त। मिनु गुइ खोइल मदुक्ब कली कुरशो ब्राख्ये एर ओंथ डोरिम पाइशशा, ओंखां पा येसु आ डोंइती तोक्गमे बाक्त। ५ मिनु येसुमी मेको आन कली मो पशो तशा, थमा सुइय्यीमी बाक्त, दे तुइक्ता बाक्त। मिनु गुइ खोइली मदुक्ब कली “आं तौ, इ पाप क्याम्साक्व” देंमाक्त। ६ मेकेर सास्त्रीपुकी यो बाक्शो बाक्मा बाक्त। ७ मेकोपुकीमी येसु आ लोव्र नेंशा, आन थुंमी “दोदेशो लोव्र पवा? परमप्रभु यावे कली शुक्शी पाइबाक्त। सुमी पाप क्याम्ने चाप्वा डा?” दे मिम्तमे बाक्त। भजन संग्रह १३०:४; यसेया ४:३, २५ ८ मिनु येसुमी आन मिम्शो तुइशशा, मेको आन कली “मारदे मोदेशो मिम्तीनी? ९ गुइ खोइल मदुक्ब कली ‘इ पाप क्याम्साक्व’ देंचा देय ‘छुल बोकशा, इ ब्राख्ये कुरशा, एर ओंथ हिरशा कोइदो’ देंचा, तेको सक्ति कोइतीक लोव्र बाक्बा? १० रागीमी जरमेशोमी पाप क्याम्चा अधिकार तशो बाक्ब, दे गेपुकीमी यो तुइक्ताक्नी” देंमाक्त। मिनु गुइ खोइली मदुक्ब कली ११ “छुल बोकशा, इ ब्राख्ये

कुरशा, इ खिं लेतो” दे मदा बाक्त। १३मिनु नेल्ल आन डोंइती मेको बोक्शा, आ ब्राख्ये जो गुप्शा कुरशा, गाक्माक्त। मिनु नेल्लेमी छक लाक्शा “ओदेशो छक लाक्चा डा गेय मुल सम्म गेनायो मतशो नय” देशा, परमप्रभु यावे कली ठेयब सेल्मे बाक्त।

लेवी कली ब्रेरशो

मत्ती ९:९-१३; लूका ५:२७-३२

१३मिनु येसु मेकेर रे लशा, लेंशा समुन्द्र आ नेक्था बाक्माक्त। मिनु मेकेर शुश मुर देल्मा बाक्त। मिनु येसुमी मेको आन कली शेंदीमी बाक्त। १४मिनु मेकेर रे लशा, तिरो पोक्ब अल्फयस आ तौ लेवी कली तिरो पोक्तीकेमी बाक्शो तशा “आं नोले खोइय्यी” दे ब्रेत्ता बाक्त। मिनु मेको बोक्शा, आ नोले खोदा बाक्त।

१५मिनु लेवी आ खिंमी जना जन बाक्मानु, तिरो पोक्ब नु पापी शुश नु काथा जामे बाक्त। मारदे हना शुशेमी येसु आ नोले खोदमे बाक्त। १६मिनु फरिसी आन दाते डा सास्त्रीपुकीमी येसु कली पापी नु तिरो पोक्बपुकी नु काथ बाक्शा जशो तशा, येसु आ शेंसीब आन कली “मारदे तिरो पोक्बपुकी, पापीपुकी नु काथा बाक्शा जाइबा?” देमा बाक्त। १७मिनु येसुमी मेको आन लोव्र नेंशा, मो देंब आन कली “रोइ मपशो मुर डाक्टर ममाल्नीम। रोइ पशो मुर ला डाक्टर माल्नीम। ठीक पाइब कली ममाइ, पापी आन कली ब्रेत्थ जाक्शो नड” दे माइक्मी बाक्त।

माइजा बाक्चा

मत्ती ९:१४-१७; लूका ५:३३-३८

१८यूहन्ना आ शेंसीबपुकी नु फरिसीपुकी माइजा बाक्बाक्मा बाक्त। मिनु मुरपुकीमी

येसु आ नेक्था जाक्शा “यूहन्ना आ शेंसीबपुकी नु फरिसी आन शेंसीबपुकी माइजा बाक्नीम। इन शेंसीबपुकी चहिं माइजा मबाक्नीम। मारदे मो पशो नमी?” दे हिल्लो पामे बाक्त। फरिसी रिती थिती सेल्शा, रिम्शो पचा कली कोवब यो बाक्शो बाक्तेक्म। १९मिनु मोदे हिल्लो पाइब आन कली येसुमी “जन्तीपुकी ग्युम्ले नु बाक्मानु, माइजा बाक्ने मचाप्नीम। २०काबु चहिं ग्युम्ले नु फ्राचा पुंइसीनीम। मिनु माइजा बाक्नीम। २१सुइमी माइत वामी नक वा क्येप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। मारदे हना माइत नु नक मगारब। २२सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा, थैलो खाक्शा क्युप्ब। थैलो यो गाक्ब। नक शांबु नक थैलोमी ला गारब” दे शेंदीमी बाक्त।

नाइक्तीक नाक्त आ पर्वम लोव्र

मत्ती १२:१-८; लूका ६:१-५

२३मिनु काबु नाइक्तीक नाक्त येसु नु आ शेंसीबपुकी चेरब रू लां गाक्मा बाक्त। मिनु गाक्मानु, शेंसीबपुकीमी चेरब बाला शोइक्चा गोव्रमे बाक्त। २४मिनु फरिसीपुकीमी येसु कली “कोव्रडीन, नाइक्तीक नाक्तीमी पचा मदुम्ब गेय मारदे पाइनीमी?” दे मदमे बाक्त। २५मिनु येसुमी “दाऊद नु आ वारचपुकी शोव्रलु बेक्मानु, दाऊदमी मार पवा, मेको ब्रेक्शो लोव्र गेनायो मपढेनी? २६ठेयब चढेब अबीयाथार आ पालामी दाऊद परमप्रभु यावे आ खिं ओव्रशा, परमप्रभु यावे कली चढेशो शोब्ले शोल्शा

जशा, आ वारच आन कली यो जचा
गेवा बाक्त, दे मपढेनी? मेको शोब्ले
चढेबपुकीमी ला जाइबाक्मा बाक्त।
अर्को मुरपुकीमी जचा मदुम्ब बाक्माक्त।
१ सामुएल २१:७; लेवी २४:६ **२७** नाइक्तीक
नाक्त मुर आन कली वोइश्शो बाक्ब।
मुरपुकी नाइक्तीक नाक्त कली ममाइ।
प्रस्थान २०:१० **२८** मोपतीके रागीम जरमेशो
दा नाइक्तीक नाक्त मार पचा, मार
मपचा मेको अधिकार पाइब बाक्ब” दे
शेंदीमी बाक्त।

नाइक्तीक नाक्त आ पर्वम लोत्र

मती १२:६-१४; लूका ६:६-११

३ मिनु येसु गुम्तीक खिं लेंशा
ओत्रमाक्त। मेकेर गुइ सोत्रशो
मुर का बाक्माक्त। **२** मिनु फरिसी नु
सास्त्रीपुकीमी “नाइक्तीक नाक्ती
सापाइक्तीक गेय पाइबा कों” दे
योत्रकी पा कोत्रडमे बाक्त, मारदे हना
दोस गेचा माल्शो बाक्मा बाक्त। **३** मिनु
येसुमी गुइ सोत्रशो मुर कली “एक
पिवो” दे मदा बाक्त। **४** मिनु योत्रकी
पा कोत्रब आन कली “नाइक्तीक
नाक्त शिशी पचा देय मरिम्शो गेय
पचा? ब्रोंडचा गेचा देय साइक्चा?
तेको लोत्र अरेतीक लोत्र नु गारबा?”
दे हिल्लो पवानु, सिक्सी पामे बाक्त।
५ मिनु सिक्सी पा बाक्शो तशा, आ थुं
खाइश्शा गाइश्शा, मेको आन कली का
का पा कोत्रशा, गुइ सोत्रशो कली “इ
गुइ दिंदो” दे मदा बाक्त। मिनु मेकोमी
गुइ दिंसेनु सामाक्त। **६** मिनु फरिसीपुकी
ग्रूशा, हेरोदी आन कली शो शु खुप्शा
“मेको कली दोपा साइक्चा ताइनय” दे
लोत्रसी पामे बाक्त।

मुर आन कली सापाइश्शो

मती १२:१५-१६; लूका ६:१७-१६

७ मिनु नोले येसु नु आ शेंसीबपुकी सहर
रे गाक्शा, गालील डा समुन्द्र आ नेक्था
जाक्दीम्मा बाक्त। शुश मुरुमी आन नोले
खोदमे बाक्त। मेको खोइक्बपुकी ते ते
डा बाक्मा बाक्त देंशा हना, गालील नु
यहूदीया रागी डा, *मती ४:२५* **८** यरूसलेम
सहर डा, इदुमेआ रागी डा, यर्दन खोला
आइक्ची हांबु डा टायर नु सीदोन सहर
डा बाक्मा बाक्त। मेकोपुकीमी येसु
आ पशो गेय आ पर्वम शुश लोत्र नेंशा
जाक्मा बाक्त। **९** मिनु येसुमी आ शेंसीब
आन कली “डोंगा का चाक्शा वोतीन”
देंमाक्त। मारदे हना शुश मुरपुकीमी नेप्शा
चुशा, येसु आ नेक्था जाक्चा बोल पामे
बाक्त। **१०** येसुमी रोइ पाइब शुश आन
कली सापदा बाक्त। रोइ पाइबपुकीमी
“थिचा तडल” दे आ नेक्था जाक्मा
बाक्त। **११** ग्रान्रा दिचा डा वोलपुकीमी येसु
कली तशा, पोक्च थेक्शा “परमप्रभु यावे
आ तौ ननी” दे वाइ ब्रेम्मा बाक्त। *लूका ४:४१*
१२ मिनु येसुमी “एको लोत्र मन्नपाइक्चा”
दे माइक्मी बाक्त। *मर्कुस १:४३-४४*

१२ जना शेंसीबपुकी वोइश्शो

मती १०:१-४; लूका ६:१२-१६

१३ काबु येसु डांडा डोंइसे बाक्त।
मिनु सु सु आन कली योत्रडा, मेको
आन कली आ नेक्था ब्रेत्ता बाक्त। मिनु
मेको ब्रेश्शोपुकी जाक्मा बाक्त। **१४** आं
नु काथा बाक्चा कली नु शेंथ सोइक्चा
कली **१५** वोल खेरतीक अधिकार तशा
बाक्मल, दे **१२** जना आन कली वोइक्मी
बाक्त। **१६** मेको **१२** जना आन नें सिमोन

आ याइनी नें पत्रुस वोदा बाक्त। १७जब्दी आ तौ याकूब नु आ लोकब यूहन्ना, मेको आस कली बोअनेरगेस नें वोदा बाक्त। बोअनेरगेस देशो “बुंबु आ तौ नस” दे रुम्सीब। लूका ६:५४ १८मिनु अन्द्रीयास, फिलीप, बारथोलोमाइ, मती, थोमास, अल्फयस आ तौ याकूब, थदेयस, सिमोन कनानी १९नु यहूदा इस्कारीयोती बाक्मा बाक्त। यहूदा चहिं नोले येसु कली साइक्ब आन कली लां कोंइब दुम्माक्त।

येसु नु आ खिं डा मुर

२०मिनु लेंशा शुश मुर खुम्समानु, येसु नु आ शेंसीबपुकी जचा कली यो नाइक्चा मतामे बाक्त। २१मिनु येसु आ खिं डा मुरपुकीमी मेको नेंशा “आ निप्स ग्यशो दुम्माक्त, दोपा यो खिं लाइक्चा” दे ब्रथ लमा बाक्त। मर्कूस ६:४; यूहन्ना ७:५; यूहन्ना ८:८४

येसु नु वोलपुकी

मती १२:२४-३२; लूका ११:१४-२३

२२यरूसलेम रे यिशो सास्त्रीपुकीमी “बेल्जीबुलमी सुम्शो बाक्माक्त। वोल आन पिप आ सक्तिमी वोल आन कली खेरबाक्माक्त” देंमा बाक्त। मती ६:३४ २३मिनु येसुमी मेको आन कली आ नेक्था ब्रेशा, कथा सेल्शा “सैतानमी सैतान कली खेरने चाप्बा डा? २४राज्य का डा मुरपुकी जिशा ब्राशा गाक्तेक्म हना, मेको राज्य जाम्शा लाइब। २५खिं का डा मुरपुकी जिम्तेक्म हना, मेको खिं मलीब। २६सैतान आ राज्यम जिशा ब्रातेक्म हना, आ राज्य नुप्शा लाइब। २७बोल्यो मुर आ खिंम सुइ खुइ पथ ओवने मचाप्नीम। बोल्यो मुर कली फ्रेंशा पाइशशा वोइशशा ला, आ मारेइ मारेइ खुइ पने चाम्सीब।

२८नोफा दाइशशा नेनीन, मुरपुकीमी पाप पाम्तेक्म हना यो, आन पशो पाप क्याम्चा ताइनीम। मरिम्शो लोत्र पाम्तेक्म हना यो, मेको पाप यो क्याम्चा ताइनीम। २९तन्न परमप्रभु यावे आ सोक्त आ पर्बम मरिम्शो लोत्र पशो पाप चहिं मक्याम्सीब। मोदेशो लोत्र पाइब आ पाप गेना हना यो लीब” देंमाक्त। हिब्रू ६:४-६ ३०मारदे हना मेकोपुकीमी येसु आ पर्बम “येसु ग्रांशा दिचा डा वोलम सुम्शो बाक्माक्त” देशो बाक्मा बाक्त। यूहन्ना १०:२०

येसु आ खिं डा मुर जाक्शो

मती १२:४६-५०; लूका ८:१६-२१

३१मिनु येसु आ ममा नु आ लोकबपुकी आ बाक्तीक लाडगामी जाक्मा बाक्त। मिनु “गो गुम्थ जाक्तक” दे तुइक्पाइक्थ मुर सोइक्तमे बाक्त। ३२मेकोपुकी जाक्मानु, शुश मुर खुम्सीशा, येसु आ नेक्था बाक्शो बाक्मा बाक्त। मिनु मेको नेक्था बाक्बपुकीमी “इन ममा नु इन लोकबम लोकब लाडगाम जाक्शा, इन कली ब्रेत्ताक्मे” दे मदमे बाक्त। ३३मिनु येसुमी “आं ममा नु आं लोकबपुकी सु नमी?” देशा, ३४आ नेक्था निशशा बाक्ब आन कली कोव्रशा “एकेर बाक्ब आं ममा नु आ लोकबपुकी नम। ३५परमप्रभु यावे आ दाक्शो पाइबपुकी आं लोकब नु आं ममा नम” देंमाक्त।

वांचेर शोक्शो कथा

मती १३:१-६; लूका ८:४-८

४ मिनु समुन्द्र आ नेक्था लशा, मेकेर बाक्शा, लेंशा शेंचा गोवा बाक्त। मेकेर शुश मुर खुम्सीशो बाक्मा बाक्त। आं चहिं डोंगा काम डोइशशा बाक्शो

बाकमाक्त। आ लोव्र नेंबपुकी समुन्द्र आ नेक्था बाक्मा बाक्त। २मिनु कथा सेल्शा, शुश लोव्र शेंदा बाक्त।

३मिनु शेंना शेंन “नेनीने, मुर का वांचेर शोकथ लमाक्त। ४मिनु ब्वारानु, गेडा का निक्शी लांमी जुक्तमे बाक्त। मिनु चिक्बीमी गुप्शा जामे बाक्त। ५गेडा का निक्शी ग्याडग्रो खपीमी जुक्तमे बाक्त। मिनु शुश खप मबाक्तीके थे थु बुक्शा, जिव जाव वामा बाक्त। ६तन्न नां पवानु, सोल सुल बेक्मा बाक्त, मारदे हना शाक्श थोकचा मतथु सोव्रमा बाक्त। ७का निक्शी चू आ दातेमी जुक्तमे बाक्त। मिनु चूमी सुम्शा, बारचा मगेवा बाक्त। मिनु मसिम्माक्त। ८का निक्शी चहिं रिम्शो खपीम जुक्तमे बाक्त। मिनु वाशा बारशा, शुश ग्रेल्शा, गेडा का के ३०, ६०, सहे का सम्म सिम्मा बाक्त” दे शेंदीमी बाक्त। ९मिनु “सु के नेंब नोफा बाक्मे, मेकोमी नेंनल” देमाक्त।

वांचेर शोकथो कथा आ अर्थ

मत्ती १३:१०-१७; लूका ८:६-१०

१०मिनु आ लोव्र नेंबपुकी गाक्मा नोले, येसु नु गाक्ब नु आ १२ जना शेंसीबपुकीमी कथा सेल्शा शेंशो लोव्र आ पर्वम हिल्लो पामे बाक्त। ११मिनु येसुमी “परमप्रभु यावे आ राज्य दोदेशो बाक्ब दे इन कली रुप्तीक थुं गेशो बाक्त। लाडगाम बाक्ब आन कली चहिं कथा सेल्शा शेंनुडमी। १२मारदे हना आन मिक्चीमी कोव्रनीम, तन्न मताइनीम। आन नोफामी नेंनीम तन्न मरुप्नीम। कोव्रशा रुप्तेक्म हना, आन थुं लेशशा, आन पाप क्याम्चा ताम वा” देमाक्त।

यसैया ६:६-१०

वांचेर शोकथ आ पर्वम शेंशो

मत्ती १३:१८-२३; लूका ८:११-१५

१३मिनु येसुमी “मेको कथा आ अर्थ मरुप्नी? मेको लायो मरुप्नी हना, अरु कथा डा शेंतीक दोपा रुप्ने चाप्नीनी? १४वांचेर शोकथमी परमप्रभु यावे आ लोव्र शोकथ। १५लांमी शोकथो दोदेशो बाक्नीम देशा हना, लोव्र नेन्नेनु, सैतानमी आन थुंमी रुप्शो लोव्र योल्ब। १६ग्याडग्रो खपीम शोकथो खोदेशोपुकीमी लोव्र नेंशा, बिश्शा ग्येरसीनीम। १७तन्न शाक्श थोकचा मतथु, शुश मलीनीम। लोव्र आ पर्वम श्येत गेचा पुंडसाक्म हना, थु प्रोइशा गाक्नीम। १८चू आ दातेमी जुक्शो खोदेशोपुकीमी लोव्र नेंनीम। १९तन्न दोपा ठेयब दुम्नुडा? दोपा क्येट चेमु? दोपा मारेइ मारेइ ताइनुडा? दे मिम्शा, आ थुंमी तेक्ब। मिनु आ नेंशो लोव्रमी फल मसिप्ब। २०रिम्शो खपीम शोकथो खोदेशोपुकीमी चहिं परमप्रभु यावे आ लोव्र नेंशा, आन थुंमी वोइक्नीम। मिनु गेडा का के ३०, ६० सहे का गेडा सम्म सिश्शा ग्रेल्नीम” दे शेंदीमी बाक्त।

परमप्रभु आ राज्य आ पर्वम शेंशो

लूका ८:१६-१८

२१मिनु येसुमी “मार, बत्ती पाथीमी गुप्शा वोइक्चा कली, खाट आगामी वोइक्चा कली दानीमी डा? मफारथु वोइक्नीमी, ममाइ डा? मत्ती ५:१५ २२खुइश्शो मखुइक्सीब, सुम्शा वोइश्शो यो हाक्सीब। मत्ती १०:२६-२७; लूका १२:२ २३सुइ के नेंब नोफा बाक्त हना, नेंनल” देमाक्त।

२४मिनु येसुमी “गे मार नेंनी, मेको नोफा दाइश्शा नेनीने। दोपा नाक्शा गेनीनी,

मोपा नाकचा पुंडसीनीनी। मत्ती ७:२ २५ मारदे हना थीब तेम्शा गेचा पुंडसीब, मथीबमी चहिं आइक्के बाकशो यो रोइक्का पुंडसीब” दे शेंदीमी बाकत। मत्ती १३:१२-१३

२६ मिनू “परमप्रभु यावे आ राज्य ओदेशो बाकब, मुर कामी आ रूमी वांचेर शोक्ब। २७ मिनू नाकदो इप्ब, सुनी बोक्ब। शोक्शो वांचेर दोपा वाबा, दे मारेइ मतुइक्ब। याकूब ५:७ २८ रू आंमा मेको वापाइक्ब। वाशा, बाला गूशा, आख सिप्ब। २९ तन्न मीमेनु, रिक्ब। मारदे हना रिक्ची जाकशो बाकब” देंमाकत।

तोरी वांचेर

मत्ती १३:३१-३२; लूका १३:१८-१९

३० मिनू “परमप्रभु यावे आ राज्य मार नु गारबा? दोदेशो कथा सेल्शा रुप्पाइक्नन्नी? ३१ वांचेर नेल्ल आन क्येडा आइक्च तोरी गेडा बाकब। ३२ तोरी गेडा वाशा, शुश राशी पाइश्शा गिग घांस आन क्येडा ठेयब रवा दुम्ब। मेको रवामी चिक्बीमी ग्योत्र सेल्शा, फाम्सीशा बाकने चाप्नीम। परमप्रभु यावे आ राज्य मेको खोदेशोन बाकब” दे शेंदीमी बाकत।

३३ मुरपुकीमी रुप्ने चाप्मेक्ल, दे शुश कथा सेल्शा, परमप्रभु यावे आ लोत्र शेंना शेंन बाक्माकत। ३४ कथा मसेल्थु, लोत्र मपाइबाक्माकत। आ शेंसीब आन कली मेको कथा आन अर्थ यो नेल्ल रुप्पाइक्बाक्माकत।

फश गिवार तेक्शो

मत्ती ८:२३-२७; लूका ८:२२-२५

३५ मोपा शेंने थुम्शा डा मिन, नां रिक्मेनु, येसुमी आ शेंसीब आन कली “समुन्द्र शोक्शा, आइक्ची हांबु जाक्दीय्य”

देंमाकत। ३६ मिनू देल्शो मुरपुकी नु ब्राशा, डोंगा का डोइश्शा, लमा बाकत। अरु डोंगा का निकशी यो लमा बाकत। ३७ मिनू लमानु, ठेयब फश गिवार पचा गोवा बाकत। फश गिवार पवानु, ब्वाक्कु डोंगामी ओत्रशा, गुम्चवा बाकत। ३८ येसु चहिं पिया थांडसीशा इप्शा निन्द्रा पवा बाकत। शेंसीबपुकीमी “ए शेंब, गो नेल्ल ब्वाक्कुमी गुम्शा बेक्चांइतय दे ममिम्तीनी?” देंशा सेंदमे बाकत। ३९ मिनू येसु बोक्शा, फश गिवार कली हुइश्शा, समुन्द्र कली “ब्वालेइ पावो, मदुक्को” देंमेनु, फश गिवार खा दिक्माकत। मिनू सिक्सी दुम्माकत। ४० मिनू शेंसीब आन कली “मारदे हिंनी? आं कली थमा मसुइक्नीनी?” देंमाकत। ४१ मेकोपुकी चहिं छक लाक्शा, शुश हिंशा “फश नु ब्वाक्कुमी यो आ लोत्र टीबाक्ताक्से। एको सु बाक्म माइ?” दे लोत्र पमुमा बाकत।

वोल आन कली पोत्रम ओत्रचा गेशो

मत्ती ८:२८-३४; लूका ८:२६-३६

५ मिनू आइक्ची हांबु गेरासीनी आन रागी जाक्दीम्मा बाकत। २ मिनू डोंगा रे तोंडसीशा, येसुमी बेक्शो मुर थिम्तीके रे पिशो ग्रांरा दिचा डा वोलमी ब्रीशो मुर का कली गुमा बाकत। ३ मेको मुर बेक्शो मुर थिम्तीकेमी बाक्बाक्माकत। सुइमी मेको कली खिंमी वोइक्ने मचाप्मे बाकत। ४ आ गुइ खोइली फ्रेंशा, साडलोमी पाइश्शा वोदमेनु यो, साडलो प्रोइश्शा प्रोक्बाक्माकत। सुइमी मेको कली ग्राशा तेक्ने मचाप्बाक्मा बाकत। ५ नाकदो नाक्ती बेक्शो मुर थिम्तीके नु डांडामी हिरशा, वाइ ब्रेशा, फुल्लुमी थोक्सीशा,

तेस्सीशा, गार सेल्सी बाक्माक्त। ६मेको मुरुमी येसु कली डोन रे तशा, दोरशा पिशा, सेउ पवा बाक्त। ७मिनु ठेयब सेंदामी ग्रीशा “परमप्रभु यावे, नेल्ल क्येडा ठेयब आ तौ, गो निक्शी मार पमुसा डा? परमप्रभु आ नें थिशा, श्येत मगेयीनी दे पुंडनन्नी” देंमाक्त। मर्कूस १:२४ ८मारदे हना येसुमी वोल् कली “ए ग्रांग्रा दिचा डा वोल्, एको मुर रे गूडो” दे माइशो बाक्माक्त। ९मिनु “श्येत मगेयीनी, दे पुंडनन्नी” देंमेनु, येसुमी “इ नें मार में?” दे हिल्लो पवा बाक्त। मिनु मेकोमी “आं नें फौज बाक्ब, मारदे हना गो शुश बाक्नीकी” देंमाक्त। १०मिनु “आंइ कली एको रागी रे मखेरचा नकी” दे पुना बाक्त। ११मेको डांडामी शुश पोव्र जोन जोन बाक्शो बाक्मा बाक्त। १२मोपतीके वोल्पुकीमी “मेको पोव्र गे लशा, आन रांमी ओव्रचा गेकी” दे पुन्मे बाक्त। १३मिनु येसुमी लशा, ओव्रचा गेमी बाक्त। मिनु ग्रांग्रा दिचा डा वोल्पुकी मुर रे गूशा लशा, पोव्र आन रांमी ओव्रमा बाक्त। मिनु मेको हजार निक्शी पोव्रपुकी रोंगु रे यिना यिन, समुन्द्रमी ग्रुम्शा बेक्मा बाक्त।

१४पोव्र योव्रबपुकीमी मो दुम्शो तशा, प्रोक्शा, सहर नु मेको रागीमी लोव्र ब्रपदमे बाक्त। मिनु मुरपुकीमी “मार दुम्मे? दो दुम्मे?” दे तुइक्थ जाक्मा बाक्त। १५मिनु येसु आ नेक्था जाक्शा, डोंइती वोल्मी ब्रीशो मुर वा फेक्शा, साशा, येसु नु निश्शो तामे बाक्त। मेको कली साशा तशा, हिंमा बाक्त। १६मिनु आन मिक्चीमी तशो तुइक्बपुकीमी नक् जाक्शो मुर आन कली मार मार दुम्मे, मेको नेल्ल शोव्रडमे बाक्त। १७मिनु मुरपुकीमी येसु कली “आंइ रागी रे गूशा लने” देंमा बाक्त।

१८मिनु येसु डोंगामी डोंइसेनु, डोंइती वोल्म ब्रीशो मुरुमी “गे नु बाक्चा गेयीनी” दे पुना बाक्त। १९मिनु येसुमी चहिं बाक्चा मगेथु “इ खिं लेशशा लशा, इ मुर आन कली प्रभुमी इ कली दोदेशो रिम्शो पवा, गिश शिशी कोंइदा तुइक्पतो” दे आ खिं सोइक्ता बाक्त। २०मिनु लशा, आ खिंमी ला ममाइ, डेकापोलीस रागी नेल्ल हिरशा, येसुमी दोदेशो रिम्शो पवा शुश मुर आन कली तुइक्पदा बाक्त। मिनु नेंबपुकीमी “गिश रिम्शो दुम्माक्त” दे छक लाक्मा बाक्त। मर्कूस ७:३१

याइरस आ तमी

मती ९:१८-२६; लूका ८:४०-५६

२१मिनु येसु डोंगा डोइशशा, समुन्द्र शोक्शा, आइक्ची हांबु जाक्दीशशा, समुन्द्र आ नेक्था बाक्माक्त। मिनु शुश मुर देल्मा बाक्त। २२मिनु याइरस नें पाइशशो गुम्तीक खिं डा ठेयब मुर का जाक्शा, येसु कली तशा, आ डोंइती बाप्शा, आ पोक्च थेक्शा २३“आं तमी बेक्चा चिक्ताक्व। आं खिं लशा, इन गुइ आं आल आ तार वोतीने। मिनु आ रोइ साशा ब्रोंइब” दे पुना बाक्त। २४मिनु येसु मेको नु लमाक्त।

मिनु शुश मुर मेको आ नोले खोइशशा, हुल् पा क्राक्शा लमा बाक्त। २५मेको शुश मुर आन दातेमी १२ बर्स डोंइती रे हुश याप्शो रोइ पाइब मीश मुर का यो बाक्माक्त। २६शुश डाक्टर आन कली कोंइशा यो, आ रोइ मसाशो बाक्माक्त। डाक्टर आन गुइ रे पा शुश श्येत जशो बाक्माक्त। आ रोइ चहिं मसाथु, डोंइती क्येडा सारो दुम्शो बाक्माक्त। आ बाक्शो मारेइ मारेइ यो नुप्शो बाक्माक्त। २७मेको मीश मुरुमी “मेको येसु माइशशो मुरुमी

रोइ पशो आन कली सापाइक्ने चाप्ब” देशो लोत्र नेशो बाक्माक्त। मिनु शुश मुर आन दातेमी ओव्रशा, नोले रे पा येसु आ फेक्शो वा थिवा बाक्त। २८मारदे हना “आ फेक्शो वा थिचा ला ताता हना यो, सानुड” दे मिम्शो बाक्माक्त। २९मिनु थिवानु, आ हुश याप्चा देक्माक्त। मिनु साडा बाक्त दे तुइक्ता बाक्त। ३०येसुमी आइक्के सापाइक्तीक सक्ति गूशो तुइश्शा, फिर लेशशा कोव्रशा “सुम आं फेक्शो वा थिवा?” दे हिल्लो पवा बाक्त।

लूका ६:१६ ३१मिनु शेंसीबपुकीमी “मिश डा मुरुमी इन कली नेप्नीम। मिनु गे ‘सुम थियी’ देंनीनी?” देंमा बाक्त। ३२येसुमी चहिं एर ओंथ नेल्ल मिक्च हिरशा, सुम थियी दे तुइक्चा मला बाक्त। ३३मिनु मीश मुरुमी हिंशा खिंखि पा पिशा, येसु आ डोंइती बाप्शा, पोक्च थेक्शा, लोत्र नेल्ल शोव्रडा बाक्त। ३४मिनु येसुमी “आं तमी, गे थमा सुइक्तीवी, मिनु इ रोइ साते। इ थुं नाइश्शा बाक्को। मुल सास डा सास बाक्को” देशा डा मिन सोइक्ता बाक्त।

३५मोपा येसुमी मीश मुर नु लोत्र पवानु, याइरस आ खिं रे जाक्शो मुरपुकीमी याइरस कली “इ तमी बेक्त। शेंब कली मारदे श्येत गेचा” दे मदमे बाक्त। ३६येसुमी मेको आन देशो मनेंखु पा, याइरस कली “महिनो। थमा सुइक्ना सुइक्न बाक्को” देंमाक्त। ३७मिनु आ नोले खोइक्ब आन कली लचा मगेथु, पत्रुस, याकूब नु आ लोक्ब यूहन्ना आन कली ला काथ लदा बाक्त।


मत्ती १७:१ ३८मिनु जाक्दीश्शा, रोंका पा डाक्ब मुर शुश तवा बाक्त। ३९मिनु खिं ओव्रशा, डाक्ब आन कली “मारदे रोंका पा डाक्नीनी? मेको आल बेक्शो

ममाइ, इप्शा बाक्शो बाक्ब” देंमाक्त। यूहन्ना ११:११ ४०मिनु मेकोपुकीमी आ देशो थमा मसुदमे बाक्त। “हत्तै, दोदेशो लोत्र पवा” देंमानु, येसुमी मेको आन कली गुंडदीमी बाक्त। मिनु आल आ आंम आफ नु आ शेंसीब आन कली आल आ बाक्तीके ओइदा बाक्त। ४१मिनु आल आ गुइ ग्याइश्शा “तालीता कूमी” देंमाक्त। मेको लोत्र आ अर्थ “ए आल, बोक्को” देशो रुम्सीब। लूका ७:१४; प्रेरित ९:४० ४२मिनु आल छुल बोक्शा, एर ओंथ हिरसे बाक्त। मेको आल १२ बर्स डा बाक्माक्त। मिनु मेकेर बाक्बपुकी मोदेशो दुम्शो तशा, थाम्पा छक लाक्मा बाक्त। ४३मिनु येसुमी “सुइ आन कली मशेंचा। आल कली जचा गेसे” दे आम आफ आस कली देंमाक्त।

मुरपुकीम येसु कली थमा मसुइश्शो

मत्ती १३:५३-५८; लूका ४:१६-३०

६ मिनु मेकेर रे लशा, आ बाक्तीके सहरमी जाक्दीम्माक्त। आ शेंसीबपुकी यो खोइश्शा लमा बाक्त। २मिनु नाइक्तीक नाक्त गुम्तीक खिं लशा, मुर आन कली शेंचा गोवा बाक्त। मिनु आ शेंशो नेंब शुशेमी छक लाक्शा “मेकोमी ओदेशो शेंचा ते रे शेंसे माइ? ओदेशो निप्स पाइश्शो लोत्र पचा दोपा जोक्गा? मेको आ गुइ रे दोदेशो सक्ति पाइश्शो गेय दुम्मे? यूहन्ना ७:१५ ३शी मुइब ममाइ डा? मरीयम आ तौ ममाइ डा? याकूब, योसेस, यहूदा नु सिमोन आन लोक्ब ममाइ डा? आ लोक्बपुकी गोपुकी नु मबाक्नीमी डा?” दे आन थुं मनुशो लोत्र पमुमा बाक्त। यूहन्ना ६:४२ ४मिनु येसुम मो देंब आन कली “तेइ तेइ परमप्रभु यावे



यहूदी आन गुन्तीक खिं

आ लोव्र पाइब आन कली ठेयब सेल्शा मान पाइनीम। आंम रागी डा नु आंम जात डा, आंम खिं डा मुरपुकीमी चहिं महिकनीम” दे माइक्मी बाक्त। ५मिनु का निक्शी रोइ पशो मुर आन कली आ गुइम थिशा सापाइक्चा डा लाक्शा, अरु सक्ति पाइश्शो गेय कोंइने मचबा बाक्त। ६मिनु “थमा मसुइय्यीमी बाक्त” दे तुइश्शा, छक लाक्माक्त। मिनु एर ओंथ डा गाउं गाउंमी हिरशा, शेना शेन गाक्माक्त।

शेंसीब आन कली सोइश्शो

मती १०:१,५; लूका ९:१-६

७मिनु काबु आ १२ जना शेंसीब आन कली ब्रेश्शा, निनिक्शी पा शेंथ सोइक्चा गोवा बाक्त। शेंसीब आन कली चोल खेरतीक सक्ति गेवा बाक्त। लूका १०:१ ८मिनु “जचा थोव्रक, क्येट, भोला मारेइ मलाइक्चा। कोक्के कुरशा, ९जुत्ता लिक्शा, फेक्तीक वा का ला फेक्शा गाक्कीन। १०गाउं सहर जाक्दीश्शा, खिं कामी ओव्रशा, बास बाक्कीन। मेको गाउं सहर रे गाक्ची मजाक्म सम्म बाक्कीन। खिं खिं याक्शा मबाक्कीन। ११इन कली बाक्चा मगेथु इन शेंशो

लोव्र यो मनेतेक्म हना, इन खोइली डा फुरक थुर थुर पाइश्शा गाक्कीन। इन मो पशोमी मेको आन कली चिन्ड दुम्ब” दे माइश्शा सोइक्तीमी बाक्त। १२मिनु शेंसीबपुकी लशा, मुर आन कली “इन थुं परमप्रभु यावे गे लेत्तीन” दे नेंपाइक्ना पाइक्न गाक्मा बाक्त। १३मिनु चोल आन कली गुंइशा खेरबाक्मा बाक्त। रोइ पशो मुर आन कली तेल खेक्शा, प्रार्थना पा सापाइक्बाक्मा बाक्त। याक्ब ५:१४-१४

यूहन्ना कली साइश्शो

मती १४:१-१२; लूका ९:७-९; लूका ३:१९-२०

१४मिनु हेरोद पिपमी मेको लोव्र नेंना बाक्त। मारदे हना येसु आ नें तेइ तेइ ब्रशो बाक्माक्त। का निक्शी मुरपुकीमी “ब्वाक्कुमी खुम्शा गुंइब यूहन्ना बेक्शो रे सेंचा पुंइसे बाक्त। मोपतीके सक्ति पाइश्शो गेय पाइबाक्माक्त” देंबाक्मा बाक्त। १५का निक्शीमी “एलीया बाक्माक्त” देंबाक्मा बाक्त। का निक्शीमी “साइ डा परमप्रभु यावे आ लोव्र पाइब आन दाते डा का, माइ” देंबाक्मा बाक्त। १६हेरोद पिपमी मोदेंशो लोव्र नेंशा “गो आ पिया क्योरपाइश्शो यूहन्ना बेक्शो रे सेंचा पुंइसे बाक्त” देंमाक्त। १७हेरोदमी हरोदनी कली ग्येरपाइश्शा, यूहन्ना कली ग्याइक्पाइश्शा, जेल्खानमी चौक्पाइश्शा वोइश्शो बाक्माक्त। मारदे हना हेरोदमी आ लोक्ब फिलीप आ मीश लाइश्शो बाक्माक्त। १८मिनु यूहन्नामी हेरोद कली “इन लोक्ब आ मीश लाइक्चा मदुम्ब” दे माइश्शो बाक्माक्त। प्रस्थान २०:१४; लेवी १८:१६ १९मोदेंशो आ पर्बम हेरोद आ मीशेमी चुरशा, यूहन्ना कली साइक्पाइक्चा माल्शो बाक्माक्त। २०तन्न

साइकपाइक्ने मचाप्शो बाक्माक्त। मारदे हना हेरोद पिपमी “यूहन्ना ठीक पाइब नु रिम्शो थुं पाइश्शो मुर बाक्ब” दे तुइश्शा, यूहन्ना क्येडा हिंबाक्माक्त। मोपतीके साइक्चा मगेथु चोइश्शो बाक्माक्त। मिनु यूहन्ना आ लोत्र नेनें दाक्शा, आ थुं ग्येत्थ लुक्य दुम्शा, नोफा दाइश्शा नेंबाक्माक्त।

२१ काबु मार दुम्माक्त देशा हना, पिप आ जरमेशो नाक्ती मिम्चा कली हेरोद पिपमी आ दरवार डा गेय पाइब, सरकार डा गेय पाइब नु गालील डा ठेयब मुर नेल्ल आन कली ब्रेश्शा, ठेयब भोज का गेवा बाक्त। **२२** मिनु हेरोदनी आ तमीमी सिल कोइदा बाक्त। मिनु हेरोद नु मेकेर खुम्सीशा बाक्बमी मेको सिल पशो तशा, शुश दाक्शा, नेल्ल ग्येरसमा बाक्त। मिनु पिपमी मेको मीश आल कली “इ दाक्शो पुनो। गो मेको गेनन” देमाक्त। **२३** मिनु लोत्र थोकशा “मार पुंइतीवी हना यो, इ पुंइशो नेल्ल गेनन। राज्य उइक्थ उइक्थ पा योक्शा यो गेनन” दे कसम जशा, लोत्र गेवा बाक्त। एस्तर ५:३-६ **२४** मिनु मीश आल गूशा, आ ममा कली “मार पुनु माइ” दे हिल्लो पवानु, आ ममामी “ब्वाक्कुम खुम्शा गुंइब यूहन्ना आ पिया गेचा नड, दे पुनो” देमाक्त। **२५** मिनु मीश आल फ्रा लेशशा, ओत्रशा पिप कली “ब्वाक्कुम खुम्शा गुंइब यूहन्ना आ पिया थालमी कुर पा गेयीनी” दे पुना बाक्त। **२६** मेको आ पुंइशो नेंशा, पिप आ थुं शुश खाइक्माक्त। तन्न मेकेर बाक्ब आन कुल कसम जशा डा मिन “इ पुंइशो गेनन” देंतीके “मगेनन” देने मचबा बाक्त। **२७** मोपतीके सिपाइ का कली “लशा, यूहन्ना आ पिया क्योरशा चाक्को” दे सोइक्ता बाक्त। **२८** मिनु आ पिया थालम कुर पा चाक्शा, मीश आल

कली गेवा बाक्त। मिनु मीश आलमी आ ममा कली गेवा बाक्त। **२६** मिनु यूहन्ना आ शेंसीबपुकीमी “यूहन्ना साइक्चा पुंइसे बाक्त” देशो नेंशा, जेल्खानमी लशा, आ बेक्शो रां लाइश्शा, थिम्मे बाक्त।

शुश मुर आन कली रूथ्री थुल्शो

मती १४:१३-२१; लूका ९:१०-१७;

यूहन्ना ६:१-१३

३० येसु आ सोइश्शोपुकी लशा शेंशा, लेशशा जाक्मा बाक्त। मिनु मार पामे, मार शेंदमे, मेको लोत्र येसु कली शोव्रडमे बाक्त। लूका ९:१०; लूका १०:१७ **३१** मिनु येसुमी “मुर मबाक्तीके लशा नांइसय” देमाक्त, मारदे हना शुश मुर गुम्थ जाक्बाक्मा बाक्त। मिनु येसु नु आ शेंसीबपुकीमी जचा कली यो नाइक्चा मतामे बाक्त।

३२ मिनु डोंगा डोइश्शा, समुन्द्र शोकशा लमा बाक्त। मुर मबाक्तीके जाक्दीश्शा, नाइक्चा, दे थुं पामे बाक्त। **३३** तन्न शुश मुरुमी येसु नु आ शेंसीब आन कली लशो तुइश्शा, डोंगाम डोइश्शो तशा, आइक्ची हांबु गे लमा बाक्त दे तुइश्शा, समुन्द्र हिरशा, दोरशा जाक्दीम्मा बाक्त। **३४** मिनु येसु डोंगा रे तोंइसीशा, शुश मुर देल्शा बाक्शो तशा, शिशी पवा बाक्त। मारदे हना मेको आन कली गोठला मपाइश्शो भेडा खोदेशो दुम्शो तामी बाक्त। मिनु शुश लोत्र शेंचा गोवा बाक्त। मती ९:३६

३५ मिनु शेंस डा शेंस पवानु, नां रिक्चवा बाक्त। मिनु शेंसीबपुकीमी येसु कली “मुर मबाक्तीके बाक्ब, नां रिक्चापुतु। **३६** एको देल्शो मुर आन कली सोइक्चा। मारदे हना गाउं सहर लशा, आंम कली जचा थोत्रक ग्याप्मेक्ल” दे मदमेनु, मर्कूस ८:१-९ **३७** येसुमी “गेपुकीमी एको आन

कली जचा गेने” दे माइक्मी बाक्त। मिनु शेंसीबपुकीमी “गोपुकी लशा, सहे निक्शी देनार खोइ डा शोब्ले ग्याप्शा, चाक्शा, थुल्चा देंनी?” दे हिल्लो पामेनु, *देनार का नाक्त का डा गाल्च बाक्त। मेको रोम डा चांदी के क्येट बाक्त।* ३८ “शोब्ले दोशो कुरनी? कोव्रथ लने” देंमाक्त। मिनु कोव्रशा “शोब्ले ५ ओटा नु डांड निक्शी बाक्त” देंमा बाक्त। ३९ मिनु येसुमी मुर आन कली गिग घांस बाक्तीके दिंममी “लस्कर पा निप्पतीन” दे माइक्मी बाक्त। ४० मिनु सहे, सहे नु ५०, ५० डा लस्कर पा निस्समा बाक्त। ४१ मिनु येसुमी शोब्ले नु डांड शेशा, सरीड गे कोव्रशा “परमप्रभु गे रिम्शो पाइब बाक्नीनी” देंशा, शोब्ले जिक्शा, निप्पाइश्शो मुर आन कली “योक्शा गेने” दे आ शेंसीब आन कली गेवा बाक्त। डांड यो योक्पाइक्मी बाक्त। *मर्कूस ७:३४* ४२ मिनु नेल्लेमी रूथ्री जामे बाक्त। ४३ मिनु जशा, हेंशो शोब्ले नु डांड गुप्मेनु, १२ डालो ब्रीमाक्त। ४४ जाइबपुकी वोंइश मुर ला ५ हजार बाक्मा बाक्त।

येसु ब्वाक्कु तार गाक्शो

मत्ती १४:२२-३३; यूहन्ना ६:१५-२१

४५ मिनु येसुमी आ शेंसीब आन कली “आं डोंइती लशा, समुन्द्र शोक्शा, बेथसैदा सहरमी जाक्दीतीन” दे डोंगामी डोइक्पाइश्शा, सोइक्तीमी बाक्त। ४६ मिनु नोले प्रार्थना पथ डांडा डोंइसे बाक्त। ४७ मिनु नां रिक्मेनु, डोंगा समुन्द्रमी बाक्माक्त। येसु चहिं डांडाम बाक्माक्त। ४८ मिनु येसुमी आ शेंसीबपुकीमी श्येत जामे बाक्त, दे तुइक्ता बाक्त। मारदे हना फशेमी डोंगा तेक्गा बाक्त। मिनु नां सोव्रचावानु, येसु ब्वाक्कु तारी

गाक्शा पिमाक्त। ४९ “मेको आन कली दाम पाइक्नुड” दे मिम्शा, पेट्चावानु, शेंसीबपुकीमी येसु कली ब्वाक्कु तारी गाक्शो तशा, वोल दाप्शा, हिंशा वाइ ब्रेम्मा बाक्त। ५० मारदे हना नेल्लेमी तामे बाक्त। मिनु शुश हिंमा बाक्त। मिनु येसुमी मेको आन कली सेश्शा “महिनीन, गो नड, इन थुं बारपतीन” देंमाक्त। ५१ मिनु डोंगा डोंइसे बाक्त। मिनु फश गिवार दिक्माक्त। मिनु शेंसीबपुकी थाम्पा छक लाक्मा बाक्त। *मर्कूस ४:३९* ५२ दोपा शोब्ले बारपदा, दे मारेइ ममिम्शो बाक्मा बाक्त। मारदे हना रुप्चा थुं मपाइबाक्मा बाक्त। *मर्कूस ८:१७*

रोइ पाइब आन कली सापाइश्शो

मत्ती १४:३४-३६

५३ मिनु समुन्द्र शोक्शा, गेनेसरेथ जाक्दीम्मा बाक्त। ५४ मिनु डोंगा रे तोंइसामानु, मुरपुकीमी येसु बाक्ब दे तुइक्तमे बाक्त। ५५ मिनु येसु ते ते लमे, मेक मेक दोरशा लशा, रोइ पशो आन कली कुरशा, आ नेक्था चाक्मे बाक्त। ५६ येसु गाउं सहर ते ते लमे, मेक मेक रोइ पशो आन कली चाक्बाक्मा बाक्त। मिनु येसु कली “इन फेक्शो वा थिचा गेयीनी” दे पुंडबाक्मा बाक्त। मिनु सु सुमी आ फेक्शो वा थीमे, मेकोपुकी साबाक्मा बाक्त। *मर्कूस ५:२७-२८; प्रेरित ५:१५; प्रेरित १६:११-१२*

साइ डा पतीके आ पर्वम शेंशो

मत्ती १५:१-२०

७ फरिसीपुकी नु सास्त्री का निक्शी यरूसलेम रे यिशा, येसु आ बाक्तीकेम जाक्मा बाक्त। २ मिनु काथ

बाकमानु, येसु आ शेंसीबपुकीमी गुइ मचिक्थु जशो तामे बाक्त। ३फरिसी नु यहूदी नेल्लेमी गुइ मचिक्थु मजाइनीम। आन जोक्ब तुइक्ब खाल्पापुकीमी वोइश्शो पतीके नेल्ल पाइनीम। ४बजार लशा लेशशा, खिं जाक्शा, चोव्रखेसीशा ला जाइनीम। कचौरा, लोटा, गाग्री, नित्तीके नेल्ल चोव्रखेचा माल्ब। मेको मोदेशो पतीके शुश पाइनीम। मती २३:२५ ५मोपतीके येसु आ शेंसीबपुकीमी गुइ मचिक्थु जशो तशा, येसु कली “इन शेंसीबपुकीमी किकी पिपीमी वोइश्शो रिती थिती मारदे मपाइनीमी? मचोव्रखेसीथु गुइ मचिक्थु जाइबाक्तेकम” दे मदमे बाक्त। ६मिनु येसुमी मेको आन कली “गे कपटीपुकी, यसैयामी पशो नोले दुम्ब लोव्र इन कली गारमाक्त। मार ब्रेक्शो बाक्त देंशा हना ‘मेकोपुकीमी शोव्र रे पा ला आं कली मान पाइनीम। आन थुंमी चहिं मदाक्नीम, आं देंशो यो मपाइनीम। यसैया २६:१३ ७आं कली सेउ पखु पा, परमप्रभु यावे आ लोव्र बाक्त, दे शेंनीमी, तन्न मरुमी मिम्शो ला शेंनीम’ दे ब्रेक्शो बाक्त। यसैया २६:१३ ८परमप्रभु यावे आ अरेशो लोव्र प्रोइशा, मरुमी वोइश्शो पतीके पाइनीनी” दे माइक्मी बाक्त। ९मिनु लोव्र बोइश्शा “गिश जोक्ब तुइक्ब ननी। परमप्रभु यावे आ देंशो शेंचा प्रोइशा, आंम सेल्लो इन पतीके ला शेंनीनी। १०मोसामी ब्रेक्शो लोव्र का ‘आम आफ आस कली मान पचा’ मिनु लोव्र का ‘सु सुमी आम आफ आस कली मरिम्शो लोव्र पामे, मेकोपुकी साइक्चा पुंइसमल’ दे ब्रेक्शो बाक्त। प्रस्थान २०:१२; प्रस्थान २१:१७ ११गेपुकीमी चहिं सुमी आम आफ आस कली ‘इन कली गेचा माल्लो थोव्रक लाइश्शा, कुरबन कली गेता’ दे माइक्बा,

मेकोमी आम आफ आस कली मारेइ गेचा ममाल्ब दे शेंनीनी। ‘कुरबन गेता’ देंशो चहिं ‘परमप्रभु कली गेता’ देंशो रुम्सीब। १२मोपा इन शेंतीक लोव्रमी आम आफ आस कली वारच पचा तेक्नीनी। १३इन वोइश्शो रिती थितीमी परमप्रभु यावे आ देंशो टिचा प्रोइपाइक्नीनी। मिनु मोदेशो कपटी गेय शुश पाइनीनी” दे हुइक्तीमी बाक्त।

ग्रांरा दिशो सेल्ब थोव्रक

१४मिनु येसुमी मुर आन कली लेंशा ब्रेश्शा “गे नेल्लेमी नोफा दाइश्शा नेंशा रुपीने। १५लाडगा रे ओव्रशो थोव्रकीमी मुर कली ग्रांरा दिशो सेल्ने मचाप्ब। मुर रे गूशो थोव्रकीमी चहिं मुर कली ग्रांरा दिशो सेल्ब। प्रेरित १०:१४-१५ १६सु के नेंब नोफा बाक्मे, मेकोमी नेंनल” दे शेंदीमी बाक्त। मर्कूस ४:२३ १७मिनु मुर आन कली प्रोइशा, खिं ओव्रमेनु, आ शेंसीबपुकीमी “इन शेंशो लोव्र थमा पा मार रुम्सीबा?” दे हिल्लो पामे बाक्त। १८मिनु येसुमी “मार, गे यो एको लोव्र मरुप्नी? लाडगा रे ओव्रशो थोव्रकीमी मुर कली ग्रांरा दिशो सेल्ने मचाप्ब, १९मारदे हना मुर आ थुंमी मओव्रब। आ कोव्रजीम ओव्रशा ग्रिम्शा, क्यी लां पा गूब, दे मतुइक्नीनी?” दे शेंदीमी बाक्त। मो देंशोमी जचा थोव्रक नेल्ल ग्रांरा मबाक्नीम, दे शेंदा बाक्त। २०मिनु मेकोमी “मुर रे मार गूबा, मेकोमी मुर कली ग्रांरा दिशो सेल्ब। २१मुर आ थुं रे दोदेंशो ग्रांरा दितीके गूब देंशा हना, तेल्लेम पचा, खुइ पचा, साइक्चा, २२ग्युबे पशो मुर अर्को नु इप्चा, शिम पचा, जोल पचा, गेहे पचा, नें तोक्चा, ठेयब लेत्चा, ममिम्थु गेय पचा। २३मोदेशो पतीके मुर

आ थुंम बाक्ब। मेको गूशा, मुर कली ग्रांग्रा दिशो सेल्ब” दे शेंदीमी बाक्त।

सुरोफोनीसीया डा मीश मुर

मती १५:२१-२८

२४मिनु बोक्शा, मेकेर रे टायर नु सीदोन गे लशा, खिं का ओव्रमाक्त। सुइमी मतुइक्तमेक्ल देंत हना यो, खुइश्शा बाक्ने मचबा बाक्त। २५मिनु ग्रांग्रा दिचा डा वोलम सुम्शो आइक्च आल आ ममामी “येसु जाक्माक्त” देंशो नेंशा, येसु आ बाक्तीके जाक्दीम्माक्त। २६मेको मीश मुर अर्को रागी डा, सुरोफोनीसीयामी जरमेशो डा बाक्माक्त। मिनु मेको जाक्शा, येसु आ डोंइती खुम्की पा बाप्शा “आं तमी रे वोल गुंइदीने” दे पुना बाक्त। २७मिनु येसुमी “डोंइती आल आन कली थुल्चा माल्ब। आल आन कली गेचा माल्शो शोब्ले कुचुम आन कली गेचा मदुम्ब” दे मदा बाक्त। २८मिनु मेको मीश मुरुमी “मदुम्ब, प्रभु, तन्न कुचुमपुकीमी यो आलपुकीमी तोक्शो शोब्ले जचा ताइनीम” देंमाक्त। २९मिनु येसुमी “इ मो देंतीके इ पुंइशो गेतन। वोल इ तमी रे गूत” दे मदा बाक्त। ३०मिनु आ खिं लेशशा जाक्मेनु, वोल गूशा, आल सेस दुम्शा इप्शो बाक्माक्त।

नोफा मनेंब कली सापाइश्शो

३१मिनु टायर रे लेशशा, सीदोन नु डेकापोलीस सहर दाते लां पा लशा, गालील डा समुन्द्र जाक्दीम्माक्त। मती १५:२६-३१; मर्कुस ५:२० ३२मिनु नोफा मनेंब मुर का चाक्शा “एको तार इन गुइ वोतीने” दे पुन्मे बाक्त। ३३मिनु येसुमी मेको नोफा मनेंब कली हुल रे फ्राशा लदा बाक्त। मिनु आ ब्रेप्चो मुर आ नोफामी

ओंइशा, थुथु पा तोक्शा, नाक्चुक्मी आ लें थिशा, ३४सरीड गे कोव्रशा, लाइश्शो सोक्त कीशा “हेफाता” दे मदा बाक्त। मेको चहिं “रोक्सो” देंशो रुम्सीब। ३५मिनु आ नोफा रोक्सीशा, नोफा नेंब दुम्माक्त। आ लें लोकसीशा, लोव्र पाइब दुम्माक्त। ३६मिनु “सुइ आन कली मशेंदीने” दे माइक्मी बाक्त। मशेंदीने माइक्मी बाक्त हना यो, मेकोपुकीमी तेइ तेइ शेंना शेंन गाक्मा बाक्त। मर्कुस १:४३-४५ ३७मिनु आ लोव्र नेंबपुकी थाम्पा छक लाक्शा “मेकोमी नेल्ल रिम्शो सेल्बाक्त। नोफा मनेंब आन कली नोफा नेंब सेल्बाक्त। लोव्र पस मजोक्ब आन कली लोव्र पाइब सेल्बाक्त” देंमा बाक्त।

४ हजार मुर आन कली थुल्शो

मती १५:३२-३६

८ मिनु लेंशा शुश मुर देल्शा बाक्शो बाक्मा बाक्त। मेकोपुकी नु मारेइ जचा थोव्रक मबाक्माक्त। मिनु येसुमी आ शेंसीब आन कली ब्रेश्शा २“एको आन कली शिशी पातामी। मारदे हना साबेर नाक्त रे मुल सम्म गो नु काथा बाक्शा, मारेइ जचा मतामे। मर्कुस ६:३४-४४ ३जचा मगेथु आन खिं खिं सोइक्ताक्डमी हना, लांमी गाक्ना गाक्न थाइनीम। का निक्शी शुश डोन रे जाक्शो बाक्नीम” देंमाक्त। ४मिनु शेंसीबपुकीमी “ओदेंशो गोरशो रागीमी इश डा मुर आन कली शोब्ले गेशा, दोपा रूपाइक्चा डा?” देंमा बाक्त। ५मिनु येसुमी “शोब्ले दोशो कुरनी?” दे हिल्लो पवानु “७ ओटा” देंमा बाक्त। ६मिनु मुर आन कली “निस्सीन” दे दिंममी निप्पपाइक्मी बाक्त। मिनु मेको ७ ओटा शोब्ले शेशा, परमप्रभु कली “गे रिम्शो

पाइब बाकनीनी” देशा, शोब्ले जिकशा, शेंसीब आन कली गेशा, योक्पदा बाक्त। मिनु मेकोपुकीमी मुर आन कली गेमे बाक्त। ७ आइक्च डांड का निक्शी यो बाक्माक्त। मेको डांड यो शेशा “गे रिम्शो पाइब बाकनीनी” देशा “योक्कीन” दे गेमी बाक्त। ८ मिनु मुरपुकीमी रूथ्री जामे बाक्त। जशा लीशो गुप्शा, ७ डालो प्रिंडमे बाक्त। ९ जाइबपुकी ४ हजार खोइ बाक्मा बाक्त। मिनु येसुमी मुर आन कली आन खिं खिं सोइक्ता बाक्त। १० मिनु छुल छाल बोक्शा, आ शेंसीबपुकी नु डोंगा डोइश्शा, दल्मानुथा रागी जाक्दीम्मा बाक्त।

फरिसीमी चिन्ड कोव्रचा माल्शो

मत्ती १६:१-४

११ मिनु फरिसी जाक्शा, येसु आ थुं थाम्चा कली “सरीड डा चिन्ड का कोइदीकी” देंमा बाक्त। यूहन्ना ६:३०
१२ मिनु येसुमी लाइश्शो सोक्त कीशा “सिनाक्त मुलाक्त डा मुरपुकीमी मारदे चिन्ड कोव्रचा माल्नीमी? नोफा दाइश्शा नेनीन, चिन्ड का यो मकोइन्ननी” देंमाक्त। १३ मिनु मेको आन कली प्रोंइशा, डोंगा डोइश्शा, समुन्द्र शोक्शा, आइक्ची हांबु जाक्दीम्मा बाक्त।

फरिसी आन बोरब ओख्ती

मत्ती १६:५-१२

१४ शेंसीबपुकीमी शोब्ले लाइक्चा प्रेंशो बाक्मा बाक्त। डोंगाम शोब्ले का ला लीशो बाक्माक्त। १५ मिनु येसुमी आ शेंसीब आन कली “नेनीने, फरिसीपुकी नु पिप हेरोद आन बोरपाइक्ब ओख्ती क्येडा होस पांडसीन” दे माइक्मी बाक्त।

लूका १२:१; मर्कूस ३:६ १६ मिनु “शोब्ले कुरचा प्रेंदमे बाक्त, दे तुइश्शा, मो देंम कों?” देंमुमा बाक्त। १७ मिनु येसुमी आन लोव्र तुइश्शा “शोब्ले मबा दे मारदे शुश लोव्र पाइनीनी? गे मुल यो मारेइ मरुप्नीनी? ममिम्नीनी? तुइक्चा यो ममाल्नीनी? मर्कूस ६:५२ १८ मिक्च पाइश्शो बाक्तीनी हना यो, मताइनीनी? नोफा पाइश्शो बाक्तीनी हना यो, मनेंनीनी? मुल यो मारेइ मिम्ने मचाप्नीनी? मत्ती ११:१३, १६ १९ गोम ५ ओटा शोब्ले जिकशा योक्शा, ५ हजार मुर आन कली थुलुनु, जशा लीशो गिश डालो प्रिंदीनी?” देंमेनु “१२ डालो” देंमा बाक्त। मर्कूस ६:४१-४४ २० “मिनु ७ ओटा शोब्लेमी ४ हजार मुर आन कली थुलुनु, जशा लीशो गिश डालो प्रिंदीनी?” देंमेनु “७ डालो” देंमा बाक्त। मर्कूस ८:८-९ २१ मिनु “मुल यो मारेइ मरुप्नीनी?” देंमाक्त।

मिक्च मताइब कली सापाइश्शो

२२ येसु नु आ शेंसीबपुकी बेथसैदा जाक्दीम्मा बाक्त। मिनु मुरपुकीमी मिक्च मताइब का चाक्शा “मेको कली थिने” दे पुन्मे बाक्त। मर्कूस ६:५६ २३ मिनु येसुमी मिक्च मताइब कली गुइमी ग्याइश्शा डा मिन, कीशा गाउं रे गुंइशा लदा बाक्त। मिनु आ मिक्चीम थुथु पा तोक्शा, आ गुइ आ तारी वोइश्शा “मुल मार मार तवी?” दे हिल्लो पवा बाक्त। यूहन्ना ६:६ २४ मिनु मेकोमी इर गे कोव्रशा “मुरपुकी गाक्शा ताता, तन्न मेको मुरपुकी रवा खोदेशो तांडसाक्म” देंमाक्त। २५ मिनु लेंशा आ गुइ आ मिक्च तारी वोदा बाक्त। मिनु मेकोमी कोव्रस डा कोव्रस पा तवा बाक्त। २६ मिनु येसुमी “गाउं हेरशा, इ खिं लावो” दे सोइक्ता बाक्त।

ख्रीस्तमी श्येत जचा माल्ब, दे शेंशो

मती १६:१३-२०; लूका ६:१८-२१;

यूहन्ना ६:६७-६६

२७ येसु नु आ शेंसीबपुकी सिजरिया फिलिप्पी गे लमा बाक्त। मिनु लांमी गाक्मानु, येसुमी “मुरपुकीमी आं पर्बम मार देंनीमी?” दे हिल्लो पवानु, २८ “का निक्शीमी ‘ब्वाक्कुम खुम्शा गुंडब यूहन्ना बाक्माक्त’ देंनीम। का निक्शीमी ‘एलीया बाक्माक्त’ देंनीम। का निक्शीमी ‘परमप्रभु यावे आ लोत्र पाइब का बाक्माक्त’ देंनीम” दे मदमे बाक्त। मर्कुस ६:१५ २६ मिनु येसुमी “गेपुकी चहिं आं कली सु सुइय्यीनी?” दे हिल्लो पवानु, पत्रुसमी “गे ख्रीस्त बाक्नीनी” देंमाक्त। ३० मिनु आ शेंसीब आन कली “एको ख्रीस्त बाक्ब, दे सुइ आन कली मशेंदीन” दे माइक्मी बाक्त। मर्कुस ६:६

साइक्चा पुंडसीचा आ पर्बम शेंशो

मती १६:२१-२३; लूका ६:२२

३१ मिनु येसुमी आ शेंसीब आन कली “रागीम जरमेशोमी शुश श्येत जचा माल्ब। जोक्ब तुइक्ब खाल्पा, ठेयब चढेब नु सास्त्रीपुकीमी मेको कली मब्राइनीम, साइक्पाइक्नीम। मिनु बेक्शो आ नित्थ नाक्ती सेंसीब” दे लोत्र मखुइक्थु शेंदीमी बाक्त। मर्कुस ४:३१; मर्कुस १०:३२-३४ ३२ मिनु पत्रुसमी येसु कली एर आइक्वी लाइशशा, हुइक्ता बाक्त। ३३ मिनु येसु हिरशा, अर्को शेंसीबपुकी गे कोत्रशा “ए सैतान, इ कुल मकोइदी। परमप्रभु यावे आ मिम्शो ममाइ, मुर आन देंशो नेंबाक्ते” दे पत्रुस कली हुइक्ता बाक्त।

दोपा ख्रीस्त आ नोले खोइक्चा

मती १६:२४-२६; लूका ६:२३-२७

३४ मिनु आ शेंसीबपुकी नु मेकेर देल्शो आन कली ब्रेशशा “सुमी आं नोले खोइक्चा थुं पाइबा, मेकोमी आंम दला दाक्स पचा प्रोइशा, श्येत जचा महिंथु, आं नोले खोइय्यील। ३५ सुमी आंम कली प्रोइचा माल्बा, मेको जाम्शा लाइब। सुमी आं पर्बम नु परमप्रभु यावे आ लोत्र आ पर्बम आंम कली जिम्मा गेबा, मेको ब्रोइब। मती १०:१६ ३६ रागी नेल्ल आंम के सेल्ने चाप्ब, तन्न बेक्त हना, मेको मार रिम्शो दुम्बा डा? ३७ मारदे हना गे मार गेशा ब्रोइने चाप्नीनी डा? ३८ सुमी हेथे गाक्ब नु पाप पाइब आन पालामी आं पर्बम नु आं लोत्र आ पर्बम मुर आन कली देंचा मुने पाइबा, मेको आ पर्बम रागीम जरमेशोमी यो आ आफ आ छेडछेड नु आ स्वर्ग डा गेय पाइबपुकी नु जाक्मेनु मेको कली तशा मुने पाइब” दे माइक्मी बाक्त। मती १०:३३

६ मिनु “नोफा दाइशशा नेनीने, मुल गो नु काथा बाक्शो का निक्शीमी परमप्रभु यावे आ राज्य सक्ति पाइशशा जाक्शो मतामे सम्म मबेक्नीम” देंमाक्त।

येसु आ रां फाइशशो

मती १७:१-१३; लूका ६:२८-३६

२ मिनु ६ नाक्त नोले येसुमी पत्रुस, याक्ब नु यूहन्ना, सां आन कली सुइ मबाक्तीके डांडामी लदा बाक्त। मिनु मेको आन डोंइती येसु फांइसे बाक्त। ३ दोपा फांइसे बाक्त देंशा हना, आ फेक्शो वा बुबु पा जिलील बुश दुम्शो तामे बाक्त। मोदेशो बुश सुइमी सेल्ने मचाप्नीम। ४ मिनु

एलीया नु मोसा गूशो तामे बाक्त। मेको निक्शीमी येसु नु लोव्वसी पाम्से बाक्त। ५मिनु पत्रुसमी येसु कली “ए शेंब, इं कली एकेर बाक्चा रिम्शो दुम्ब। बाक्तीके सां सेल्य। इन कली का, मोसा कली का नु एलीया कली का सेल्य” देंमाक्त। ६मारदे हना मार देंचा दे मतुइक्ता बाक्त। मिनु शुश हिंमा बाक्त। ७मिनु गोस्सुमी नेल्ल आन कली गिल्मी बाक्त। गोस्स आगा रे सेंदा का गूशा “एको आं दाक्शो तौ बाक्ब। आ लोव्व नेनीने” देंशो नेन्मे बाक्त। मर्कूस १:११; २पत्रुस १:१७ ८मिनु एर ओंथ कोव्वडमेनु, येसु ला तामे बाक्त।

९मिनु डांडा रे ब्रुम्मानु, येसुमी “रागीम जरमेशो बेक्शो रे सेंचा मपुंडसे सम्म इन तशो सुइ आन कली मशेंदीने” दे माइक्मी बाक्त। मर्कूस ८:३० १०मिनु मोदेंशो दुम्शो सुइ आन कली मशेंदमे बाक्त। “बेक्शो रे सेंचा पुंडसीचा देंशो मार बाक्म माइ” दे हिल्लो पमुमा बाक्त। ११मिनु आ शेंसीबपुकीमी येसु कली “डोंइती एलीया जाक्चा माल्ब, दे सास्त्रीपुकीम शेंनीम। मारदे मोदें शेंनीमी?” दे हिल्लो पामेनु, १२येसुमी “एलीया डोंइती जाक्शा, नेल्ल ठीक सेल्ब। मिनु रागीम जरमेशो श्येत जाइब नु महिक्सीशो दुम्ब, दे ब्रेक्शो बाक्बा, ममाइ डा? मलाकी ३:१३; यसेया ५३:३-५ १३एलीया डोंइती जाक्त। मिनु आ पर्बम डोंइती ब्रेक्शो खोदेंशो दुम्शा, मेको कली मार पचा दाक्तमे, मेको पाम्तेक्म” दे शेंदीमी बाक्त। मत्ती ११:१४; १राजा १६:२-१०

वोलम तशो आल सापाइश्शो

मत्ती १७:१४-२०; लूका ६:३७-४२

१४मिनु अरु शेंसीब आन बाक्तीकेमी लेशशा जाक्शा, शुश मुर देल्शो नु

सास्त्रीपुकीमी लीशो शेंसीब आन कली लोव्व हिल्लो पशो तामे बाक्त। १५मिनु देल्शो मुरपुकीमी येसु कली तशा, छक लाक्शा, दोरशा पिशा, येसु कली सेउ पदमे बाक्त। १६मिनु येसुमी “मेकोपुकी नु मार लोव्वसी पनी” दे हिल्लो पवानु, १७देल्शो मुर आन दाते डा कामी “ए शेंब, आं तौ एक चाक्ता, मारदे हना वोल्मी तशा, लाटा दुम्शो बाक्ब। १८वोल्मी सुमानु, गोल्ब। आ शोव्व रे बोग्यो गुंडब। आ खुइ शेण्ब। मिनु आ रां मदुक्ब दुम्ब। इन शेंसीब आन कली ‘वोल गुंडदीन’ दे पुंडता, तन्न वोल् गुंडने मचबेम” देंमाक्त। १९मिनु येसुमी “गे थमा पा थमा मसुइक्बपुकी, गेना सम्म गेपुकी नु बाक्नुडा डा? ओदेंशो इन पशो गेना सम्म फाल्शा बाक्नुडा डा? रोइ पाइब कली चाक्कीन” दे माइक्मी बाक्त। २०मिनु वोंइश आल कली येसु आ डोंइती चाक्मे बाक्त। मिनु वोल्मी येसु कली तवानु, आल तिड गोल्शा, रोम्सीशा, आ शोव्व रे बोग्यो गुंडदा बाक्त। २१मिनु येसुमी आ आफ कली “गेना रे ओदेंशो दुम्शो?” दे हिल्लो पवानु, आ आफोमी “आइक्च रेन, २२एको वोल्मी साइक्चा कली मीमी दुप्पदानु, ब्वाक्कुमी गुम्पदानु, शुश खेयप हेर हेरा बेक्त। गे मारेइ पने चाप्नीनी हना, शिशी पा एको श्येत जचा रे प्रॉइयीकी” देंमाक्त। २३मिनु येसुमी “गे मारेइ पने चाप्नीनी कों देंनीनी। तन्न सु सुमी गेन चाप्नीनी देंशा, थमा सुइक्नीमी, मेकोपुकीमी आन पुंडशो ताइनीम” देंमाक्त। २४मिनु आल आ आफोमी “थमा सुइक्ता, आं थमा मसुइक्ब थुं कली थमा सुइक्पतीने” दे थुं खाइश्शा, डाक्शा देंमाक्त। २५मिनु येसुमी

शुश मुर आन कली एर ओंथ रे जाक्शो तशा, ग्रांग्रा दिचा डा वोल कली “गे लाटा नु नोफा मनैब वोल, गेनायो लेंशा मओव्रचा डा पा गूशा लावो” दे हुइश्शा, खेरा बाक्त। २६मिनु वोल वाइ ब्रेशा, आल कली रोप्पाइश्शा गूमाक्त। मिनु आल बेक्शो खोदेशो दुम्माक्त। मुरपुकीमी “बेक्त” देंमा बाक्त। मर्कूस १:२६ २७मिनु येसुमी आल आ गुइ ग्याइश्शा पोक्गानु, राम्माक्त।

२८मिनु येसु नु आ शेंसीबपुकी खिं लमा बाक्त। मिनु शेंसीबपुकीमी “मारदे मेको वोल कली गुंइने मचाप्का?” दे हिल्लो पामे बाक्त। २९मिनु येसुमी “ओदेशो वोल कली प्रार्थना पशा ला गुंइने चाम्सीब” दे माइक्मी बाक्त।

रागीम जरमेशो श्येत जचा माल्शो

मती १७:२२-२८; लूका ६:४३-४५

३०मिनु मेकोपुकीमी “इं गाक्शो सुइम मतुइक्तमेक्ल” दे गालील लां पा गाक्मा बाक्त। ३१मारदे हना आ शेंसीब आन कली “रागीम जरमेशो दा मुर आन गुइमी गेशा, साइक्चा पुंडसीशा, आ नित्थ नाक्ती बेक्शो रे सेंसीब” दे शेंचा दाक्ता बाक्त। मर्कूस ८:३१; मर्कूस १०:३२-३४ ३२शेंसीबपुकीमी चहिं आ शेंशो मरुप्मे बाक्त। मिनु हिल्लो पचा यो हिंमा बाक्त। लूका १८:३-४

नेल्ल क्येडा ठेयब सु बाक्वा

मती १८:१-५; लूका ६:४६-४८

३३मिनु कापेरनाउम जाक्दीम्मा बाक्त। मिनु खिं का ओव्रशा, येसुमी आ शेंसीब आन कली “लांमी गाक्वानु, मार लोव्रसी पनी?” दे हिल्लो पचा बाक्त। ३४तन्न

मेकोपुकी सिक्सी पामे बाक्त, मारदे हना लांमी गाक्मानु “नेल्ल क्येडा ठेयब सु बाक्वा माइ?” दे लोव्र पशो बाक्मा बाक्त। ३५मिनु निश्शा, शेंसीब आन कली आ नेक्था ब्रेशा “नेल्ल क्येडा डोंइती दुम्चा कली नेल्ल क्येडा नोले दुम्शा, नेल्ल आन गेय पाइब दुम्चा माल्ब” देंमाक्त। मर्कूस १०:४३-४४; मती २६:११; लूका २२:२६-२७ ३६मिनु आल का आन दातेमी चाक्शा, आल कली मुप्शा ३७“सुमी आं नेंमी ओदेशो आल कली ब्राइबा, मेकोमी आं कली ब्राइब। आं कली ब्राइबमी आं कली ममाइ, तन्न आं कली सोइक्ब कली यो ब्राइब” दे माइक्मी बाक्त। मती १०:४०

रिम्शो पचा मतेक्वा

लूका ६:५६-५०

३८यूहन्नामी येसु कली “ए शेंब, गोपुकी नु मगाक्ब मुर कामी इन नें थिशा, वोल आन कली खेरशो ताइतक। मिनु मो पचा मदुम्ब, दे माइक्तक” देंमाक्त। गन्ती १०:२७-२८ ३९मिनु येसुमी “मदुम्ब, दे मदेंचा, मारदे हना आं नें थिशा, ठेयब गेय पाइबमी आं पर्वम लोव्र मक्याल्ब। ४०इं कली मरिम्शो मपाइब मेको इं मुरुन बाक्ब। मती १२:३०; लूका ११:२३ ४१नोफा दाइश्शा नेनीने, सुमी आं नें थिशा, ख्रीस्त आ मुर नम देंशा, इन कली लोटा का ब्वाक्कु तूचा गेबा, मेकोमी दोपा यो आ इनाम ताइब। मती १०:४२

थमा सुइक्वा मतेक्वा

मती १८:६-९; लूका लूका १७:१-२

४२सुमी आं कली थमा सुइक्ब आइक्च आल आ थमा सुइक्तीक क्याल्बा, मेको

कली आ शुरम यात क्युकशा, समुन्द्रमी ताइशशा साइक्चा रिम्शो बाक्ब। ४३इ गुइमी तेक्तु हना, मेको गुइ खोतो। मारदे हना निम्फा गुइ पाइशशा दुम्शा, गेनायो मकाप्व नरक डा मीम ओव्रचा क्येडा, डुंडे दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:३० ४४नरकमी बाक्ब आन लुस्पु मबेक्नीम, मी यो मकाप्व। ४५इ खोइलीमी तेक्तु हना, मेको खोतो। मारदे हना खोइली निम्फा पाइशशा दुम्शा नरकम ओव्रचा क्येडा, खोरन्डे दुम्शा, परमप्रभु यावे आ राज्यमी ओव्रचा तचा रिम्शो बाक्ब। ४६नरकमी बाक्ब आन लुस्पु मबेक्नीम, मी यो मकाप्व। ४७इ मिक्चीमी तेक्तु हना, मेको मिक्च फेशशा ताइक्तो। मारदे हना मिक्च निम्फा पाइशशा दुम्शा, नरकम ओव्रचा क्येडा, काना दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:२६ ४८नरकमी बाक्ब आन लुस्पु मबेक्नीम, मी यो मकाप्व। यसेया ६६:२४

४९नेल्ल मीम याक्पाइक्चा पुंडसीनीम। मारेइ चढेमेनु, हिक्सी सुप्शो चढेनीम। लेवी २:१३; गन्ती १८:१६ ५०हिक्सी डाम्ताक्व हना, ब्रोव्रब। हिक्सी आ डाम्तीक जाम्त हना, मारम डाम्पाइक्चा डा? हिक्सी डाम्शो दुमीन। मिनु दुशा बाक्कीन” दे शेंदीमी बाक्त। मत्ती ५:१३; लूका १४:१४; कलस्सी ४:६

१० मिनु मेकेर रे लशा, यहूदीया रागी नु यर्दन खोला आइक्ची हांबु जाक्दीम्मा बाक्त। मिनु लेंशा शुश मुर देल्मा बाक्त। मिनु तेइ तेइ गाक्शा, दोपा शेंदा, मोपा मेको आन कली यो शेंदा बाक्त।

वोंइश मीश आस नाता

मत्ती १६:१-६

२मिनु फरिसीपुकी जाक्शा, आ थुं थाम्चा कली “मीश कली प्रोंइचा दुम्बा देय मदुम्बा?” दे हिल्लो पामे बाक्त। ३मिनु येसुमी “मोसामी इन कली मार पन देंमे?” देंमेनु ४“छोड पत्र ब्रेक्शा, सोइक्चा दुम्ब देंत” देंमा बाक्त। व्यवस्था २४:१; मत्ती ५:३१-३२ ५मिनु येसुमी “मुरपुकीमी शिशी मपाइनीम, दे तुइशशा, मोदेशो पचा गेवा बाक्त। ६नेल्ल क्येडा डोंइती परमप्रभु यावेमी वोंइश मुर नु मीश मुर सेलतीम्सी। उत्पत्ती १:२७ ७मोपतीके मुरुमी आम आफ प्रोंइशा, आ मीश नु गारशा बाक्ब। उत्पत्ती २:२४ ८मिनु मेको निक्शी रां का दुम्नीस। मोपतीके वोंइश मीश निक्शी मनसी, निम्फा का नस। ९परमप्रभु यावेमी कांइचीक सेल्लो आस कली मुरुमी मफ़ादमेक्ल” दे माइक्मी बाक्त।

१०मिनु खिंमी बाक्मेनु, आ शेंसीबपुकीमी “इन शेंशो मार रुम्सीबा” दे हिल्लो पामे बाक्त। ११मिनु येसुमी “सुमी आ मीश प्रोंइशा, अर्को चाक्बा, मेकोमी वोंइश मीश आस नाता खोइक्ब। लूका १६:१८; १कोरिन्थी ७:८-११ १२मीश मुरुमी आ वोंइश प्रोंइशा, अर्को खोइक्तु हना, मेकोमी यो वोंइश मीश आस नाता खोइक्ब” देंमाक्त।

येसु नु आलपुकी

मत्ती १६:१३-१५; लूका १८:१५-१७

१३मिनु येसुमी आ गुइ आल आन तारी वोदल दे आलपुकी चाक्गमे बाक्त। मिनु शेंसीबपुकीमी आल चाक्ब आन कली “मचाक्कीन” दे हुइक्तमे बाक्त। १४मिनु

येसुमी मेको तशा, आ थुं मनुथु हुइक्ब आन कली “आल आन कली आं बाक्तीके जाक्वा गेने, मतेक्कीन। मारदे हना परमप्रभु यावे आ राज्य आल आन केन बाक्ब। १५नोफा दाइश्शा नेनीने, मुरपुकीमी आल आन थुं डा मिम्शो खोदेंशो पा ममिम्ताक्म हना, परमप्रभु यावे आ राज्यमी ओव्रचा मताइनीम” दे माइक्मी बाक्त। १६मिनु आल आन कली मुप्शा, आ गुइ आन तारी वोइश्शा, आसीक गेमी बाक्त।

शोंप आ पर्बम लोव्र

मत्ती १६:१-६

१७मिनु मेकेर रे लमेनु, मुर का दोरशा पिशा, येसु आ डोंइती पोक्च थेक्शा बाप्शा “शेंब, गे रिम्शो ननी। गेना हना यो ब्रोंइशा बाक्चा कली मार पचा माल्नुडा?” दे हिल्लो पवा बाक्त। १८मिनु येसुमी “मारदे आं कली रिम्शो मुर दे माइय्यी? सुइ रिम्शो मनमी। परमप्रभु यावे ला रिम्शो बाक्ब। १९परमप्रभु यावे आ अरेशो लोव्र तुइक्नेवे। मसाइक्चा, वोंइश मीश आस नाता मख्रोइक्चा, खुइ मपचा, सांकछी बाक्शोनु, जोल मपचा, हिंच कोंइशा मारेइ मरोइक्चा, आम आफ आस कली मान पचा, दे ब्रेक्शो बाक्ब” दे मदा बाक्त। प्रस्थान २०:१२-१७ २०मिनु मेकोमी “गो आल रेन मेको नेल्ल पन पन बाक्ती” देंमेनु, २१येसुमी मेको आ कुल शिरशा कोव्रशा, मेको कली दाक्शा “का चहिं मपवी। लशा, इ शोंप नेल्ल लेयशा, जचा फेक्चा मताइब आन कली योक्शा गेमी। मिनु लेश्शा, आं नोले खोइय्यी। मिनु इ शोंप स्वर्गमी बाक्ब” देंमाक्त। मर्कूस ८:३४; मत्ती १०:३८ २२मेको लोव्र नेंशा, आ कुल राव किकपाइश्शा,

आ थुं खाइश्शा, गाक्माक्त। मारदे हना मेको शुश शोंप पाइश्शो मुर बाक्माक्त।

२३मिनु येसुमी एर ओंथ कोव्रशा, आ शेंसीब आन कली “शुश शोंप पाइश्शो मुर परमप्रभु यावे आ राज्य ओव्रचा गिश श्येत बाक्बा” देंमाक्त। २४मेको लोव्र नेंशा, शेंसीबपुकी छक लाक्मा बाक्त। मिनु येसुमी लोव्र थोक्शा “आलपुकी, आन शोंपोम थमा सुइक्ब आन कली परमप्रभु यावे आ राज्य ओव्रचा शुश श्येत दुम्ब। २५शोंप पाइश्शो मुर परमप्रभु यावे आ राज्य ओव्रने चाप्चा क्येडा, दलओंठ लूजे आ पोलाम ग्रीने चाप्ब” देंमाक्त। २६मिनु शेंसीबपुकी थाम्पा छक लाक्शा “मो हना, सु ओव्रचा ताइबा डा?” देंमुमा बाक्त। २७मिनु येसुमी आन कुल गे कोव्रशा “मुरपुकीमी पने मचाप्नीम। तन्न परमप्रभु यावेमी पने चाप्ब, मारदे हना परमप्रभु यावेमी मारेइ मारेइ पने चाप्ब” दे माइक्मी बाक्त।

येसु आ नोले खोइक्ब आन इनाम

मत्ती १६:२७-३०; लूका १८:२८-३०

२८पत्रुसमी येसु कली “गो मारेइ मारेइ प्रोंइशा, इन नोले खोइक्तक” देंमेनु, २९येसुमी “नोफा दाइश्शा नेनीन, सुमी आं पर्बम नु ग्येरपाइक्ब लोव्र आ पर्बम आ खिं, लोकबम लोकब, आम आफ, तमी तौ नु रू प्रोंइबा, ३०मेकोमी खेदा पा श्येत जचा पुंडसाक्व हना यो, मुल आ प्रोंइशो क्येडा शुश खिं, लोकबम लोकब, आम आफ, तमी तौ नु रू ताइब। मिनु नोले गेना हना यो परमप्रभु यावे नु बाक्चा ताइब। ३१डोंइती दुम्शोपुकी नोले दुम्नीम। नोले दुम्शोपुकी डोंइती दुम्नीम” दे शेंदीमी बाक्त।

रागीम जरमेशो साइक्चा पुंडसीब देंशो

मत्ती २१:१७-१९; लूका १८:३१-३४

३२ मिनु यरूसलेम डा लां खोइशशा गाकमानु, येसु नेल्ल आन डोंइती गाकमाक्त। आ नोले खोइक्बपुकी छक लाक्शा हिंमा बाक्त। मिनु १२ जना शेंसीब आन कली लेंशा आ नेक्था ब्रेशशा, आ कली मार दुम्बा दे तुइक्पाइक्चा गोवा बाक्त। मर्कूस ९:११ ३३ मिनु “मुल यरूसलेम लाइनय। मिनु रागीम जरमेशो ठेयब चढेब नु सास्त्री आन गुइमी गेचा पुंडसीब। मिनु मेकोपुकीमी दोस गेशा, साइक्चा माल्ब, दे अर्को जात डा मुर आन गुइमी गेनीम। ३४ मिनु मेकोपुकीमी शुक्शी पशा, आ कुलमी तोक्शा युक्नीम। मिनु साइक्नीम। मिनु बेक्शो आ नित्थ नाक्ती बेक्शो रे सेंसीब” दे तुइक्पाइक्मी बाक्त।

ठेयब सु बाक्बा?

मत्ती २०:२०-३८

३५ मिनु जब्दी आ तौ याकूब नु यूहन्ना येसु आ नेक्था जाक्शा “ए शेंब, मार पुंडस्कु, मेको तस्कुल” दे पुन्से बाक्त। ३६ मिनु येसुमी “मार पुंडनीसी?” दे हिल्लो पवानु, ३७ मेको निक्शीमी “गे सक्ति पाइशशो दुम्शा, हुकुम पाइब दुम्नीनु, का इन ग्युरा, का इन पेरा गे बाक्चा गेचा नस्कु” दे पुन्से बाक्त। ३८ तन्न येसुमी “गे मार पुंडसी, मेको मरुप्नीसी। आं तूचा माल्शो कचौरा तूने चाप्नीसी? आं बुद पा श्येतम खुम्चा पुंडसीने चाप्नीसी?” देंमेनु मर्कूस १४:३६; लूका १२:५० ३९ “चाप्नस्कु” देंसा बाक्त। मिनु येसुमी “आं तूचा माल्शो कचौरा यो तूनीसी। आं बुद पा श्येतम खुम्चा यो पुंडसीनीसी। प्रेरित १२:२

४० तन्न आं ग्युरा पेरा गे बाक्चा गेचा चहिं आं गुइमी ममाइ। परमप्रभु यावेमी योत्रचा पुंडसीशो मुर ला मेकेर बाक्चा ताइनीम” दे माइक्सी बाक्त।

४१ मिनु शेंसीब १० जनामी मेको आस कली मोदेंशो पुंडशो तशा “याकूब नु यूहन्ना दोदेंशो बाक्सा” दे आन थुं मनुथु, लोत्र पमुमा बाक्त। लूका २२:२५-२७ ४२ मिनु येसुमी नेल्ल आन कली खुप्शा “अर्को जात डा मुर आन कली हुकुम पाइनुड, दे मिम्बपुकीमी मुर आन कली दिप्शा वोइशशा, हुकुम पाइनीम, दे तुइक्नीनी। ४३ तन्न इन दातेमी मोदेंशो पचा मदुम्ब। सुमी ठेयब दुम्चा दाक्बा, मेको नेल्ल आन गेय पाइब दुम्चा माल्ब। ४४ सु नेल्ल क्येडा डोंइती दुम्चा दाक्बा, मेको नेल्ल आन वाइल दुम्चा माल्ब। मर्कूस ९:३५; १ पत्रुस ५:३ ४५ मारदे हना रागीम जरमेशो यो मान पपांडसीचा कली ममाइ, तन्न वारच पथ नु शुश मुर आन कली प्रोंइचा कली आ गिम गेथ जाक्शो बाक्त” दे माइक्मी बाक्त।

मिक्च मताइब बारतीमै

मत्ती २०:२९-३४; लूका १८:३५-४३

४६ मिनु यरीको सहरमी जाक्दीम्मा बाक्त। मिनु यरीको रे लशा, येसु नु आ शेंसीब आन नोले खोइशशा, शुश मुर गाकमानु, तिमै आ तौ मिक्च मताइब पुंडब बारतीमै मेको लां उइ बाक्शो बाक्माक्त। ४७ मिनु बारतीमैमी नासरथ डा येसु एको लां पिना पिन बाक्त देंशो नेंशा “ए येसु, दाऊद आ तौ, शिशी पाइय्यीनी” दे वाइ ब्रेत्चा गोवा बाक्त। ४८ मिनु शुशेमी “सिक्सी पावो” दे हुइक्तमे बाक्त। आं चहिं डोंइती क्येडा शुश वाइ ब्रेशशा

“दाऊद आ तौ, शिशी पाइय्यीनी” दे ब्रेम्माक्त। ४६मिनु येसु खा दिक्शा “मेको कली एके ब्रेत्तीने” देंमाक्त। मिनु मिक्च मताइब कली “ठेयब थुं पावो। मिनु बोक्को। मारदे हना इ कली ब्रेत्ताक्व” दे मदमे बाक्त। ४७मिनु आ बरखी ताइश्शा, छुल बोक्शा, येसु आ डोंइती जाक्माक्त। ४८मिनु येसुमी “इ कली मार पड, मार पुंइनेवे?” दे हिल्लो पवा बाक्त। मिनु मिक्च मताइबमी “ए शेंब, मिक्च ताइब सेल्यीनी” दे पुना बाक्त। ४९मिनु येसुमी “साशा लावो। इ थमा सुइश्शोमी साते” दे मदानु, ब्रा साशा मिक्च ताइब दुम्शा, येसु आ नोले खोदा बाक्त।

येसु यरूसलेमम जाक्दीश्शो

मती २१:१-११; लूका १९:२९-४०;

यूहन्ना १२:१२-१९

११ मिनु यरूसलेम आ नेक्था जैतून डांडा बेथफागे नु बेथानी जाक्दीम्मा बाक्त। २मिनु येसुमी आ शेंसीब निक्शी आस कली “मेरे गाउं लसे। मिनु गाउं ओव्रसीनु, सुइ मडोइश्शो गधा आ चाइक्ब पाइश्शा, वोइश्शो थित्नीसी। ३मेको चाक्कीसे। मुरपुकीमी ‘मारदे लाइक्सी?’ देंतेक्म हना ‘प्रभु कली माल्ताक्व। नोले लेशशा सोइक्ब’ देंसीनु, लाइक्चा गेनीम” दे सोइक्तीम्सी बाक्त। ४मिनु मेको निक्शी लशा, मेक जाक्दीश्शा, लांमी लाप्चो आ डोंइती पाइश्शो गधा आ चाइक्ब थित्से बाक्त। मिनु प्रोन्से बाक्त। ५मेकेर बाक्ब मुरपुकीमी “मारदे प्रोंइसी?” देंमा बाक्त। ६मिनु येसुमी देशो खोदेशो पा, लोव्र लेत्से बाक्त। मिनु लाइक्चा गेमे बाक्त। ७मिनु गधा आ चाइक्ब चाक्से बाक्त। मिनु

आन वासी ब्रामे बाक्त। मिनु येसु डोंइसे बाक्त।

८मिनु शुशेमी आन बरखी लांमी ब्रामे बाक्त। अरुमी एर ओंथ डा राशी जिक्शा, लांमी ब्रामे बाक्त। ९डोंइती नोले गाक्बपुकीमी “होसन्ना, प्रभु आ नेमी जाक्ब ठेयब दुम्ल। होसन्ना ‘वारच पने’ देशो बाक्ब। भजन संग्रह ११८:२५-२६ १०मुल जाक्चशो इं किकी पिपी दाऊद आ राज्य कली जाइ। परमप्रभु कली होसन्ना” दे रेयके पा ठेयब सेल्ना सेल्न गाक्मा बाक्त।

११मिनु यरूसलेम जाक्दीशा, परमप्रभु यावे आ खिं ओव्रमाक्त। मिनु एर ओंथ मारेइ मारेइ कोव्रशा, आ शेंसीब १२ जना नु बेथानी लेम्माक्त। मारदे हना नां रिक्चशो बाक्माक्त।

फल मसिश्शो फोव्रशी रवा

मती २१:१२-२२; लूका १९:४५-४८;

यूहन्ना २:१३-१६

१२आ दीसा बेथानी रे पिशा, लांमी गाक्मानु, येसु शोव्रलु बेक्माक्त। १३मिनु इच्छी आइक्था सफा पाइश्शो फोव्रशी रवा तशा, फोव्रशी सिश्शो बाक्म कों दे कोव्रथ लमाक्त। मिनु जाक्दीश्शा कोव्रडानु, सफा ला तवा बाक्त। मारदे हना सित्ची मजाक्शो बाक्माक्त। १४मिनु “मुल डा मेरे सुइमी इ फल जचा मतामेक्ल” दे मदा बाक्त। आ शेंसीबपुकीमी मो देशो नेन्मे बाक्त।

ग्याप्ब लेयब आन कली खेरशो

१५मिनु यरूसलेम जाक्दीम्मा बाक्त। जाक्दीश्शा येसु परमप्रभु यावे आ खिं ओव्रशा, मेकेर ग्याप्ब लेयब आन कली खेरचा गोवा बाक्त। क्येट फाइक्ब आन

क्येट वोइक्तीके नु ढुकुर लेयब आन नित्तीके खोलशा गेमी बाक्त। १६मिनु सुइ कली मारेइ यो चाक्शा लेयचा मगेथु, १७“जात जात डा मुरपुकीमी एकेर प्रार्थना पामेक्ल दे आं खिं वोइश्शो बाक्त दे ब्रेक्शो बाक्बा, ममाइ डा? गेपुकीमी चहिं खुइपुकीमी खुइ पा चाक्शा आन बाक्तीके पुक्खी सेलतीनी” दे हुइक्तीमी बाक्त। *यसेया ५६:७; येरमीया ७:११* १८मिनु फरिसी नु सास्त्रीपुकीमी मेको नेंशा, दोपा साइक्चा दे लां कोव्रडमे बाक्त। तन्न येसु कली तशा, हिंमा बाक्त। मारदे हना मुर नेल्लेमी आ शेंशो नेंशा, छक लाक्बाक्मा बाक्त। १९मिनु नां रिक्चावानु, येसु नु आ शेंसीबपुकी सहर रे लेम्मा बाक्त।

दल्गीर मपथु, प्रार्थना पचा

२०मिनु सुनी लां गाक्मानु, फोव्रशी रवा आ डर रे पुं सम्म सोव्रशो तामे बाक्त। २१मिनु पत्रुसमी ति फ्रुक्शा, येसु कली “ए शेंब, कोव्रडीन, इन सराप पशो फोव्रशी रवा सोव्रमाक्त” देंमाक्त। २२मिनु येसुमी मेको आन कली “परमप्रभु यावे कली थमा सुतीने। २३नोफा दाइश्शा नेनीने, सुमी आं देंशो थमा दुम्ब, दे दल्गीर मपथु, मेको डांडा कली ‘एकेर रे समुन्द्रमी याक्सो’ देंत हना, मेको आ थमा सुइश्शोमी डांडा याक्सीशा लाइब। *मर्कूस ६:२३; मती १७:२०* २४मोपतीके ‘आं पुंइशो ताइनुड’ दे थमा सुइश्शा, प्रार्थना पा पुंइतीनी हना, इन पुंइशो ताइनीनी। *मती ७:७; यूहन्ना १४:१३; १यूहन्ना ५:१४-१५* २५प्रार्थना पा बाक्नीनु, सुइ नु चुरशो बाक्तीनी हना, मेको कली माफ गेने। मिनु स्वर्गम बाक्ब इन आफोमी यो इन मरिम्शो पशो क्याम्शा माफ गेब। २६माफ

मगेतीनी हना, स्वर्गम बाक्ब इन आफोमी यो इन कली माफ मगेब” दे शेंदीमी बाक्त।

अधिकार आ परबम हिल्लो पशो

मती २१:२३-२७; लूका २०:१-८

२७मिनु यरूसलेममी जाक्दीम्मा बाक्त। मिनु येसु परमप्रभु यावे आ खिंमी हिरसेनु, ठेयब चढेब, सास्त्री नु जोक्ब तुइक्ब खाल्पापुकी जाक्शा २८“तेको अधिकारमी मोदेंशो पवी? मो पचा, दे सुमी अधिकार गेवे?” देंमा बाक्त। २९मिनु येसुमी “गो इन कली लोव्र का हिल्लो पाइनुड, मेको लोव्र लेत्तीने। मिनु तेको अधिकारमी एको गेय पडा शेंनन्नी। ३०यूहन्नामी मुर आन कली ब्वाक्कुमी खुम्शा गुंइतीके अधिकार स्वर्ग रे तवा देय मुर रे तवा? लो देनीन” दे माइक्मीनु, ३१मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी देंब। ३२मुर रे तवा बाक्त देंचा यो दोपा देंय” दे लोव्रसी पमुमा बाक्त। मोदेंशो देंचा हिंमा बाक्त। मारदे हना मुर नेल्लेमी यूहन्ना थमान परमप्रभु यावे आ लोव्र पाइब बाक्ब, दे थमा सुइश्शो बाक्मा बाक्त। *लूका ७:२६-३०* ३३मोपतीके “मतुइक्नीकी” देंमानु, येसुमी “मो हना तेको अधिकारमी एको गेय पडा दे गो यो मशेंनन्नी” दे माइक्मी बाक्त।

मरिम्शो बुम्था पाइब आन कथा

मती २१:३३-४६; लूका २०:९-१६

१२ मिनु येसुमी कथा सेल्शा, शेंचा गोवा बाक्त। मिनु “मुर कामी अडगुर खुम्शा, थारपु हिरशा, अडगुर खाक्तीक खाल्टा दोशा, धन्सार सेल्शा,

बुम्था पाइब माल्शा, मेको आन कली गेशा वोइश्शा, अर्को रागी लमावत। *यसैया ५:१-२* २मिनु अडगुर मीशा, सेक्ची जावमेनु, आ गेय पाइब का कली आ भाग पोक्थ सोइक्ता बावत। ३मिनु मेको जावदीम्मेनु, बुम्था पाइबपुकीमी मेको कली तुप्शा, श्येत्थ गुइ सोइक्तमे बावत। ४मिनु लेंशा गेय पाइब का कली सोइक्ता बावत। मेको कली यो जिचा तोशा, पिया प्रोल्शा, गार सेल्शा सोइक्तमे बावत। *२इतिहास ३६:१६* ५मिनु लेंशा का कली सोइक्तानु, मेको कली सदमे बावत। मोदें शुश खेयप गेय पाइब आन कली सोइक्तानु, का निक्शी आन कली तुप्मे बावत। का निक्शी आन कली सदमे बावत।

६मिनु सोइक्ने चाप्चा डा का ला लीमावत। मेको आ दाक्शो तौ बाक्मावत। मिनु 'आं तौ आ देशो टीनीम' दे मिम्शा, आ तौ कली सोइक्ता बावत। ७मिनु बुम्था पाइबपुकीमी 'एको दा अडस ताइब बावत। लो साइक्चा। मिनु आ अडस नेल्ल इं केन दुम्ब' देंमुशा गारमा बावत। ८मिनु ग्याइश्शा, साइश्शा, रू रे लाइश्शा ताइक्तमे बावत। *हिब्रू १३:१२*

९मोदेशो दुम्त हना, रू आ होव्रपम मार पाइबा? जाक्शा, मेको बुम्था पाइब आन कली साइक्ब। मिनु आ रू अरु आन कली गेब। १०'खिं सेल्बपुकीमी गारो प्रोव्रडमेनु, एको फुल्लु मगार, दे ताइक्तमे बावत। मेको मगारथु ताइश्शा फुल्लु चहिं सुर डा सुरे फुल्लु दुम्मावत' दे ब्रेक्शो लोव्र मपढेनी? ११मेको नेल्ल प्रभुमी पशो बावत। मिनु 'ओहो, गिश रिम्शो दुम्मे। एको छक लाक्चा डा बाक्ब' दे ब्रेक्शो बाक्ब" दे माइक्मी बावत। *भजन संग्रह ११८:२२-२३* १२मिनु "एको

कथा इं कली कका देंमावत" दे रुप्शा, ग्याइक्पाइक्चा माल्मे बावत। तन्न शुश मुर देल्शो तशा हिंशा, ब्राशा लमा बावत।

तिरो थाप्चा देय मथाप्चा?

मती २२:१५-२२; लूका २०:२०-२६

१३मिनु येसु कली लोव्र खाइक्पाइक्चा दे फरिसी नु हेरोदी का निक्शी येसु आ बाक्तीके सोइक्तमे बावत। १४मिनु मेको सोइश्शोपुकी जाक्शा, येसु कली "शेंब, गे थमा पाइब ननी। मुर आन कुल मकोव्रथु सुइ तशा महिथु, परमप्रभु यावे आ लोव्र थमा पा शेंनीनी, दे तुइक्नीकी। सिजर सरकार कली तिरो थाप्चान माल्ब देय मथाप्थु यो दुम्बा? १५गोपुकीमी थाप्चा देय मथाप्चा? मार देंनीनी" दे हिल्लो पखु पा लोव्र खाइक्पाइक्चा माल्मे बावत। मिनु येसुमी मेको आन पचा माल्शो तुइश्शा, मेको आन कली "मारदे आं थुं थाम्नीनी? देनार का कोंइदीनी" देंमावत। *देनार का नाक्त का डा गाल्च बावत।*

मेको रोम डा चांदी के क्येट बावत। १६मिनु देनार का कोंइदमे बावत। मिनु येसुमी "एको सु आ नेंमी खोइश्शा बाक्मे?" देंमेनु "सिजर आ नेंमी खोइश्शा बावत" देंमा बावत। १७मिनु येसुमी "सिजर आ मार मार बाक्मा, मेको सिजर कली गेने। परमप्रभु यावे आ मार मार बाक्मा, मेको परमप्रभु यावे कली गेने" दे माइक्मी बावत। मिनु नेल्ल छक लाक्मा बावत।

रोमी १३:१७

बेक्शो रे सेंसीचा आ पर्बम शेंशो

मती २२:२३-३३; लूका २०:२७-३८

१८मिनु सदुकीपुकी जाक्मा बावत। सदुकीपुकीमी बेक्शो रे मसेंसीब दे

शेंनीम। मिनु येसु आ बाक्तीके जाक्शा
 १६“ए शेंब, मोसामी ब्रेक्शो लोव्रमी ‘सुइ
 आ लोकब आल मथिथु बेक्त हना,
 मेकोमी आ भोग्यु वोंडसीशा, आ लोकब
 आ खिं डा मुर मजाम्मल, दे तमी तौ
 थिवल’ दे ब्रेक्शो बाक्त। *ब्यवस्था २५:५-६*
 २०मिनु खिं कामी ७ जना लोकब बाक्मा
 बाक्त। डोंइती जेठामी मीश चाक्गा
 बाक्त। मिनु आल मथिथु बेक्माक्त।
 २१मिनु माइलामी आ भोग्यु वोंडसे बाक्त।
 मिनु आ यो आल मथिथु बेक्माक्त।
 मिनु साइलामी वोंडसे बाक्त। मेको यो
 आल मथिथु बेक्माक्त। २२मोदेशो पा
 ७ जनान आल मथिथु, बेक्मा बाक्त।
 मिनु नोले मेको मीश मुर यो बेक्माक्त।
 २३मुर बेक्शो रे सेंसीशा ब्रोंइमानु, मेको
 ७ जना वोंडश आन मीश दुम्शो मीश मुर
 तेको आ मीश दुम्बा?” दे हिल्लो पामे
 बाक्त। २४मिनु येसुमी “गे परमप्रभु यावे
 आ लोव्र मरुप्नीनी। परमप्रभु यावे आ
 सक्ति यो मतुइक्नीनी। मोपतीके दूली
 मिम्नीनी, ममाइ? २५बेक्शो रे सेंसीशा
 ब्रोंइमानु, मुरपुकीमी ग्युंवे मपाइनीम,
 स्वर्गम बाक्ब परमप्रभु यावे आ गेय
 पाइबपुकी खोदेशो दुम्नीम। २६बेक्शो रे
 सेंसीचा आ परबम परमप्रभु यावेमी मोसा
 कली मी ब्रशो रवा आ नेक्था गुम्शा
 ‘अब्राहाम आ परमप्रभु यावे, इसहाक
 आ परमप्रभु यावे नु याकूब आ परमप्रभु
 यावे गो नड’ दे मदा बाक्त दे मोसामी
 ब्रेक्शो किताबमी ब्रेक्शो बाक्ब। मेको
 लोव्र मपढेनी? *प्रस्थान ३:६* २७परमप्रभु
 यावे बेक्शो मुर आन परमप्रभु ममाइ,
 ब्रोंइशो आन परमप्रभु यावे बाक्ब। गे
 दूली मिम्बाक्नी बाक्त” दे माइक्मी
 बाक्त।

नेल्ल क्येडा तुइक्चा माल्लो लोव्र

मती २२:३५-४०; लूका १०:२५-२८

२८मिनु सास्त्री कामी सदुकीपुकीमी येसु
 नु लोव्र पशो नेंशा, येसुमी मेको आन लोव्र
 लेन्ने चाप्बाक्त, दे रुष्शा डा मिन, येसु आ
 नेक्था जाक्शा “ए शेंब, परमप्रभु यावे आ
 अरेशो लोव्र तेको नेल्ल क्येडा डोंइती डा
 बाक्बा?” दे हिल्लो पवा बाक्त। २९मिनु
 येसुमी “नेल्ल क्येडा डोंइती डा लोव्र
 एकोन बाक्ब ‘ए इस्राएल नेनो, इ परमप्रभु
 यावे का बाक्ब। ३०थुं का पा, सोक्त का
 पा, मिम्तीके नु सक्ति नेल्लेमी परमप्रभु
 यावे, इ परमप्रभु कली दाक्तो’ देशो एको
 लोव्र नेल्ल क्येडा डोंइती डा बाक्ब।
ब्यवस्था ६:४-५ ३१मिनु आ नोले डा ठेयब
 लोव्र ‘आंम इ कली दाक्शो खोदेशो पा इ
 नेक्था बाक्ब आन कली यो दाक्तो’ देशो
 बाक्ब। एको लोव्र निक्शी क्येडा ठेयब
 लोव्र मबाक्ब” देमाक्त। *लेवी १६:१८* ३२मिनु
 सास्त्रीमी “शेंब, गे थमान ठीक लोव्र
 पाइतीनी। परमप्रभु यावे कानाइ बाक्ब।
 आ डा लाक्शा सुइ मबाक्ब। *लूका २०:३६-४०*
 ३३मिनु थुं का पा, रुप्तीक नु सक्ति
 नेल्लेमी परमप्रभु यावे कली दाक्चा, आंम
 कली दाक्शो खोदेशो पा इ नेक्था बाक्ब
 आन कली दाक्चा, देशो लोव्र नेल्ल
 क्येडा ठेयब बाक्त। मारेइ मारेइ क्योरशा
 चढेशो क्येडा मेको लोव्र टिशा पचा रिम्शो
 बाक्ब” देमाक्त। *१सामुएल १५:२२; होसे ६:६;*
मती ६:१३ ३४मिनु येसुमी “एकोमी निप्स
 खाप्शो लोव्र पाइबाक्त” दे रुष्शा “गे
 परमप्रभु यावे आ राज्य रे डोन मबाक्नी
 बाक्त” दे मदा बाक्त। में डा मेरे हिंशा,
 सुइमी लोव्र हिल्लो मपामे बाक्त।
प्रेरित २६:२७-२९

ख्रीस्त सु का आ तौ बाक्वा?

मत्ती २२:४१-४६; लूका २०:४१-४४

३५ मिनु येसुमी परमप्रभु यावे आ खिंमी शेंना शेंन बाक्मेनु “ख्रीस्त दाऊद आ तौ बाक्माक्त, दे सास्त्रीपुकीमी दोपा शेंने चाप्नीमी डा? यसेया ११:१; यूहन्ना ७:४२; रोमी १:३

३६ दाऊदमी परमप्रभु यावे आ सोक्त रे पा ‘प्रभुमी आं प्रभु कली इ जोरी सत्रु आन कली इ खोइली आगाम मवोदुमी सम्म आं ग्युरा गे बाक्को’ देंत। भजन संग्रह ११०:१; २सामुएल २३:२

३७ दाऊदमी मेको कली प्रभु देंब। मिनु दोपा आ तौ दुम्ने चाप्बा डा?” दे शेंदा बाक्त। शुश मुरुमी आ शेंशो लोव्र नेंचा दाक्तमे बाक्त।

सास्त्री आन कली हुइशो

मत्ती २५:५-१४; लूका २०:४५-४७

३८ मिनु शेंना शेंन “सास्त्री आन लोव्र क्येडा होस पांडसीने। मेकोपुकीमी लाइशो कोट फेक्शा गाक्चा दाक्नीम। बजारमी हिरशा, मान पपांडसीचा दाक्नीम। ३९ गुम्तीक खिंमी ठेयब नित्तीकेमी नित्चा दाक्नीम। भोजमी मान पपांडसीचा डा नित्तीकेमी नित्चा दाक्नीम। ४० वोंइश बेक्शो मीश मुर आन शोंप नेल्ल नेक्शा गेशा, दुइशो दुइशो प्रार्थना पा कोंइखु पाइनीम। मोदेशो पाइबपुकीमी अरु आन क्येडा शुश सजाइ ताइनीम” देंमाक्त। याकूब १:२७

पुडग मीश मुरु आ चढेशो क्येट

लूका २१:१-४

४१ मिनु येसुमी क्येट चढेतीक एरे निशशा, शुश मुरुमी क्येट चढेशो कोव्रना कोव्रन बाक्माक्त। क्येट थीब शुशेमी शुश

क्येट चढेमे बाक्त। २राजा १२:१० ४२ मिनु आ वोंइश बेक्शो मारेइ मथीब पुडग मीश मुर का जाक्शा, लेप्तोन निक्शी चढेवा बाक्त। लेप्तोन का नेल्ल क्येडा आइक्च तांबा के क्येट बाक्त। ४३ मिनु येसुमी आ शेंसीब आन कली ब्रेशशा “नोफा दाइशशा नेनीने, नेल्लेमी चढेशो क्येडा मेको पुडग मीश मुरुमी शुश चढेपुतु। ४४ आ जशा ब्रोंइतीक क्येट नेल्ल गेपुतु। अरुमी चहिं आन गाप्शो रे गेम्तेक्म” देंमाक्त।

“परमप्रभु आ खिं मलीब” देशो

मत्ती २४:२; लूका २१:५-३६; लूका १७:२३-३७

१३ मिनु येसु परमप्रभु यावे आ खिं रे गूमेनु, आ शेंसीब कामी “ए शेंब, कोव्रडीन, एको खिं ठेयब फुल्लु के सेल्शा, दोमो कोल्शो गिश दारशो तांडसाक्व” देंमाक्त। २ मिनु येसुमी “मुल ओमो ठेयब दारशो सेल्शो खिं ताप्तीवी। तन्न नोले ब्रेशशा, फुल्लु का यो खोप्शा मलीब” देंमाक्त।

श्येत दुम्चा गोइब

३ मिनु परमप्रभु यावे आ खिं तांडसीचा डा पा जैतून डांडामी निस्सेनु, पत्रुस, याकूब, यूहन्ना नु अन्द्रीयास जाक्शा, मत्ती १७:१ ४ येसु कली “एको इन देशो लोव्र गेना दुम्बा? एको नेल्ल दुम्चापुतु, दे तुइक्पाइक्चा डा चिन्ड दोपा तांडसीनीमी? शेंदीकी” देंमा बाक्त। ५ मिनु येसुमी “सुइमी इं थुं मक्यामेक्ल, दे होस पा बाक्कीन। ६ शुश मुरुमी आं नें ब्रशा ‘गो एको नड’ देशा, मुर आन थुं क्याइक्नीम। यूहन्ना ८:४६ ७ शुश लडाइ दुम्शो लोव्र नेनीनु, महिनीन। मोदेशो दुम्चान माल्ब। रागी नुप्ची चहिं मजा। ८ रागी नुप्चा क्येडा

डोंइती जात जात नु राज्य राज्यमी लडाइ पमुइनीम। रागी रागीमी खिनु कुइब। अन्काल दुम्ब। मो दुम्मेनु, श्येत दुम्चा गोवा बाक्त, दे तुंडसीब।

थमा सुइक्व ग्याइक्चा पुंडसीनीम

६आंम इन कली मिम्शा होस पा बाक्कीन। कछडी वोइक्चा पुंडसीनीनी। गुम्तीक खिंमी तुप्या पुंडसीनीनी। आं नें आ पर्वम हुकुम पाइब नु पिप आन डोंइती राप्पाइक्चा पुंडसीशा, सांकछी दुम्चा माल्नीनी। १०मोदेशो दुम्चा क्येडा डोंइती रागी नेल्ल डा मुर आन कली ग्येरपाइक्ब लोत्र नेंपाइक्ने थुम्शो दुम्चा माल्ब। मर्कूस १६:१५ ११मिनु इन कली ठेयब मुर आन डोंइती राप्पदमेनु, मार लोत्र पय, मार देंय? दे हिंशा, मिम्स डा मिम्स मबाक्कीन। इन कली दोदेशो लोत्र पचा गेशो बाक्मे, मोदेशो लोत्र पने। मारदे हना गे लोत्र मपाइनीनी, परमप्रभु यावे आ सोक्तीम इन कली लोत्र पपाइक्ब।

१२लोकबमी आ लोकब कली साइक्पाइक्चा गेब। आफोमी तौ कली साइक्पाइक्ब। मिनु तमी तौपुकीमी आम आफ आस कली ग्याइक्पाइक्चा साइक्पाइक्नीम। १३आं नें आ पर्वम सुइम इन कली मदाक्नीम। सु सु चहिं नेल्ल क्येडा नोले सम्म थमा सुइक्चा मप्रोंइथु बाक्नीमी, मेकोपुकी श्येत जचा रे ब्रोंइशा, गेना हना यो परमप्रभु यावे नु बाक्चा ताइनीम। यूहन्ना १५:१८,२१

मुल सम्म मदुम्शो श्येत दुम्ब

१४परमप्रभु यावे आ खिं गेनायो मदुम्चा डा पा बिथोलो दुम्मेनु, मेको मुल पढेबपुकीमी रुप्मेक्ल, यहूदीया

रागीम बाक्बपुकी डांडा ग्येतथ प्रोक्मल। दानीएल ६:२७; दानीएल ११:३१; दानीएल ११:३१ १५बारदालीम बाक्बपुकीमी 'तोइश्शा, खिं ओत्रशा मारेइ लाइक्चा ताइनुड' दे ममिन्तमेक्ल, दिव दाव प्रेक्शा प्रोक्मल। १६रूमी गेय पाइबपुकीमी 'फेक्तीक का लाइक्नुड' देशा, खिं मलेम्मल। तन्न आन गेय थु था प्रोंइशा प्रोक्मल। १७कोत्रज कुरशो नु दूध तूब आल पाइश्शो मीश मुर अरु क्येडा शुश श्येत जाइनीम। १८हिउंदमी मोदेशो श्येत मदुम्ल, दे परमप्रभु यावे कली पुनीने। १९परमप्रभु यावेमी रागी सेला रे मुल सम्म सुइमी मतुइश्शो श्येत दुम्ब। मोदेशो श्येत लेंशा गेनायो मपीब। दानीएल १२:१ २०प्रभुमी मोदेशो श्येत जतीक नाक्त शुश वोइश्शो हना, सुइ ब्रोंइने मचाप्नीम। तन्न आ योत्रशो आन पर्वम प्रभुमी मेको श्येत शुश नाक्ती लीचा मगेब।

२१मिनु मुरपुकीमी 'ख्रीस्त एकेर जाक्त, मेरेक बाक्ब, लो कोत्रडीन' देंतेक्म हना, थमा मसुतीन। २२शुशेमी 'गो ख्रीस्त नड' दे जोल पा गाक्नीम। 'परमप्रभु यावे आ लोत्र पाइब नकी' दे जोल पाइबपुकीमी चिन्ड नु छक लाक्चा डा गेय पा कोंइनीम। मेकोपुकीमी परमप्रभु यावे आ योत्रशो आन कली यो लां प्रोंइपाइक्चा माल्नीम। २३मेको दुम्चा डोंइतीन नेल्ल शेंशा तुइक्पाइक्तन्नी। एको लोत्र मिम्शा मप्रेंथु बाक्कीन।

रागीम जरमेशो जाक्ब

२४रागीमी मोदेशो ठेयब श्येत नुम्मेनु, सरीडमी चिन्ड तांडसीनीम। नां आ छेडछेड जाम्शा, जिक रिक्शो दुम्ब। तास्ला आ हाम्सो यो जाम्ब। २५सौरुल

खपीम दोक्नीम। सरीडमी बाक्शो सक्तिपुकी हिम्सीनीम। *हिब्रू १२:२६* २६मिनु मुरपुकीमी रागीम जरमेशो कली गोस्सुमी गिल्सीशा, शुश सक्ति पाइश्शा, यिना यिन पशो ताइनीम। *दानीएल ७:१३* २७मिनु रागीम जरमेशोमी परमप्रभु यावे आ गेय पाइब आन कली रागी तेइ तेइ रे परमप्रभु यावे आ योव्रशो नेल्ल आन कली खुष्शा चाक्थ सोइक्ब। *मती १३:४१*

२८फोव्रशी रवा कोच्वा दाप्शा कुशो तनीनु, बर्खा जाक्माक्त दे तुइक्नीनी। २९आं देशो लोव्र थमा दुम्शो तनीनु, आं जाक्ची जाक्माक्त दे तुइक्नीनी। ३०नोफा दाइश्शा नेनीने, एको जात डा मुर मनुष्थु, आं देशो थमा दुम्ब। ३१सरीड नु रागी नेल्ल जाम्शा लाइनीम, आं लोव्र चहिं गेना हना यो मजाम्थु लीब।

३२मोदेशो गेना दुम्ब, दे सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी लायो मतुइक्ब। आं आफोमी ला तुइक्ब।

सासीशा बाक्चा माल्ब

३३मोदेशो गेना दुम्बा मतुइक्नीनी। मोपतीके सासीशा बाक्कीन। *लूका १२:३५-४०; लूका २१:३६* ३४दोदेशो दुम्ब देशा हना, मुर का तेइ तेइ हिरथ लमेनु, लचा डोंइती आ गेय पाइब आन कली का का पा आन गेय योक्शा, लाप्चो खाल पाइब कली 'गेना हना यो लां कोव्रशा बाक्को' दे माइश्शा लाइब। ३५आं खिं डा प्रभु गेना लेशशा जाक्बा, दे मतुइक्नीनी। नां रिक्शा जाक्बा कों? नाक्दो जाक्बा कों? भाले ग्रीची ना जाक्बा कों? सुनी जाक्बा कों दे मारेइ मतुइक्नीनी। मेको इन मतुइक्थु जाक्ब।

लूका १२:३८ ३६इन मतुइक्थु जाक्मेनु, इन कली इप्शो मथिदल। ३७मोपतीके लां कोव्रशा सासीशा बाक्कीन दे माइक्तन्नी। मोदेशो नेल्ल आन कली माइक्नुडमी” दे शेंदीमी बाक्त।

येसु कली साइक्चा माल्शो

मती २६: - २८:-; लूका २२: - २४:-;

यूहन्ना १८: - २१:-

१४ मिनु बोरब ओरुती मसुष्शो शोब्ले जतीक पास्सा चाड आ निक्शी नाक्ती डोंइती ठेयब चढेब नु सास्त्रीपुकीमी “येसु कली दोपा मुर आन मतुइक्थु ग्याइश्शा, साइक्पाइक्चा” दे लोव्रसी पममानु २“चाड नाक्ती मदुम्ब, मुरपुकीमी मरिम्शो पाइनीम” देमुमा बाक्त।

येसु तेल खेक्चा पुंइसीशो

३येसु बेथानीमी कोर पाइब सिमोन आ खिंमी खमे जना जन बाक्मेनु, मीश मुर कामी शुश क्येट लाइब ब्रोव्रशो रिना मुर पाइश्शो तेल कुरशा जाक्शा, मेको तेल येसु आ पियामी लुक्ता बाक्त। ४मिनु मेकेर बाक्ब का निक्शीमी “ओदेशो तेल मारदे एकोमी ओपा ताइक्ता? ५लेयड हना, सहे सां देनार क्येडा शुश ताक्शा, श्येत जाइब आन कली योक्शा, वारच पने चाम्स वा” दे आन थुं मनुथु, मीश मुर कली हुइक्तमे बाक्त। *देनार का नाक्त का डा गाल्च बाक्त। मेको रोम डा चांदी के क्येट बाक्त।* ६मिनु येसुमी “महुइक्तीने, मारदे आ थुं खाइक्पाइक्नी? आं कली रिम्शो पाइक्ती। ७श्येत जशो मुर गेना हना यो थित्नीनी, मिनु शिशी पाइक्चा दाक्ताक्नी हना, गेना हना यो पाइक्ने चाप्नीनी। आं कली

चहिं नोले मथित्नीनी। *व्यवस्था १५:११* ८ आ चाप्शो पाप्तु। बेक्चा क्येडा डोंइती आं रां थिम्चा कली तेल खेक्ताक्व। ९ नोफा दाइशशा नेनीने, रागीम ते ते आं लोव्र नेंपाइक्नीमी, मेक मेक एको आ पशो आ पर्बम यो लोव्र पाइनीम” देंमाक्त।

इस्कारीयोत डा यहूदा आ पशो

१० इस्कारीयोत डा यहूदा येसु आ शेंसीब कामी ठेयब चढेब आन कली “येसु कली ग्याइक्चा वारच पाइनन्नी” दे लोव्र पथ लमाक्त। मिनु मेकोपुकीमी आ देंशो नेंशा, ग्येरशा “लो, रिम्शोन दुम्त। क्येट गेनीकी” देंमा बाक्त। ११ में डा मेरे “गेना नु दोपा ग्याइक्चा वारच पदुमी” दे योव्रकी पना पन गाक्माक्त।

पास्सा चाड डा भोज

१२ बोरब ओरुती मसुप्शो शोब्ले जतीक चाड आ डोंइती डा नाक्ती पास्सा डा पाठा क्योरशा ब्वाइनीम। मिनु येसु आ शेंसीबपुकीमी “पास्सा मानेचा कली ते लशा साचा? मार देंनीनी?” दे हिल्लो पामे बाक्त। १३ मिनु येसुमी शेंसीब निक्शी आस कली “सहर लसे। मिनु गाग्री कुरशो मुर का कली गुम्नीसी। मेको आ नोले खोतीसे। १४ मिनु मेको तेको खिं ओव्रबा, गे यो ओव्रडीसे। मिनु खिं डा मुर कली “शेंबमी सोइशशो नस्कु। शेंबमी आ शेंसीबपुकी नु काथ बाक्शा, पास्सा ते मानेचा? दे हिल्लो पथ सोइक्ताक्की” दे मतीसे। *मर्कूस ११:३* १५ मो माइक्सीनु, मेकोमी इस कली तला तारी ठेयब कोठा का कोंइब। मेको कोठामी गुन्द्री पीरा ब्रशा वोइशशो थित्नीसी। मिनु मेकेरन साचा” दे सोइक्तीम्सी बाक्त। १६ मिनु

मेको निक्शी लशा, सहर जाक्दीशशा, येसुमी दोदेंशो देंमे, मोदेंशो थित्से बाक्त। मिनु पास्सा चाड डा भोज सादसे बाक्त।

१७ मिनु नां रिक्मेनु, येसु नु आ १२ जना शेंसीब खुम्समा बाक्त। १८ मिनु जना जन बाक्मानु, येसुमी “नोफा दाइशशा नेनीन। मुल एक बाक्ब काम आं कली ग्याइक्ब आन कली वारच पाइब। मुल गो नु काथ जना जन बाक्ब” देंमाक्त। *यूहन्ना १३:२१-२६*

१९ मिनु नेल्लेमी शुश मरिम्शो लाक्शा “ए प्रभु, मेको वारच पाइब गो दुम्नुडा कों?” दे का का पा हिल्लो पामे बाक्त। २० मिनु येसुमी “१२ जना शेंसीब इन दाते डा का बाक्ब। गो नु काथा शोब्ले शेक्कुम तेप्बमी आं कली ग्याइक्पाइक्चा वारच पाइब। २१ मारदे हना रागीम जरमेशो आ पर्बम ब्रेक्शो लोव्र नेल्ल थमा दुम्चा माल्ब। मेको बेक्चा माल्ब। मो हना यो रागीम जरमेशो कली ग्याइक्पाइक्चा वारच पाइब कली शुश मरिम्शो दुम्ब। मो देंशो पाइब मुर मजरमेस हना, मेको कली रिम्शो दुम्ब वा” दे माइक्मी बाक्त।

२२ मिनु जना जन बाक्मानु, शोब्ले शेशा “गे रिम्शो पाइब बाक्नीनी” दे प्रार्थना पशा जिक्शा, आ शेंसीब आन कली योक्शा “दांइसीने, एको आं रां बाक्ब” देंमाक्त।

१ कोरिन्थी ११:२३-२५ २३ मिनु कचौरा शेशा “गे रिम्शो पाइब बाक्नीनी” दे प्रार्थना पा, मेको आन कली तूचा गेमी बाक्त। मिनु नेल्लेमी तूडमे बाक्त। २४ मिनु “एको आं हुश बाक्ब। आं हुशेमी परमप्रभु यावे आ गेशो नक लोव्र खाप्ता। आं हुश जारशोमी शुश मुर आन पाप क्याम्सीब।

प्रस्थान २४:८; हिब्रू ६:१५-१६ २५ नोफा दाइशशा नेनीन, मुल डा मेरे एको अडगुर रे सेल्शो तूतीके मतूनुड। नोले नेल्ल नक दुम्शा,

परमप्रभु यावे आ राज्यमी बाक्शा तूनुड” दे माइक्मी बाक्त। २६मिनु कुम्सो पा बोक्शा, जैतून डांडा ग्येत्थ लमा बाक्त।

भजन संग्रह ११३:- ११८:-

पत्रुसमी “गेनायो मप्रॉइनन्नी” देशो

२७मिनु लना लन बाक्मानु, येसुमी “गे नेल्लेमी इन थुं ग्यशा, आं कली प्रॉइनीनी। मारदे हना ओदें ब्रेक्शो लोत्र थमा दुम्ब ‘गो गोठला कली तुप्शा खेरनुड। मिनु भेडापुकी प्रोक्शा, साव सुव ब्राइनीम’ देशो बाक्ब। जकरिया १३:७; यूहन्ना १६:३२ २८नोले गो बेक्शो रे सेंचा पुंडसीशा, इन डोंइती गालील रागी जाक्दीतनुड” देमाक्त। मर्कूस १६:७ २६मिनु पत्रुसमी “मेको नेल्लेमी इन कली प्रॉइशा प्रोक्तेकम हना यो, गो मप्रॉइनन्नी” देंमेनु, यूहन्ना १३:३८ ३०येसुमी “नोफा दाइश्शा नेनो, में नाक्दोन भाले खेयप निक्शी मग्रीथु, खेयप सां सम्म ‘मेको कली मतुइक्नुड, सु बाक्म’ दे आं पर्बम देनेवे” दे मदा बाक्त। ३१मिनु पत्रुसमी “मदेनुड, गे नु काथा बाक्शा, साइक्चा पुंडसाक्थी हना यो, मोदेशो गेनायो मदेनुड” दे लोत्र थोक्शा देंमाक्त। आ शेंसीब नेल्लेमी यो मो देंमा बाक्त।

गेथ्सेमनेमी प्रार्थना पशो

३२मिनु गेथ्सेमने जाक्दीम्मा बाक्त। मिनु येसुमी “लो, एक बाक्कीन। गो इच्ची आइक्था लशा, प्रार्थना पाइनुड” देशा, ३३पत्रुस, याकूब नु यूहन्ना सां आन कली आइक्था लाइश्शा लमाक्त। येसु आ थुं शुश खाइक्माक्त। मत्ती १७:१ ३४मिनु सां आन कली “आं थुं शुश खाइश्शा, बेक्चा डा दुम्ती। मइप्थु गो नु काथा बाक्कीन” दे माइक्मी बाक्त। यूहन्ना १२:२७ ३५मिनु

इक्का डोंइती लशा, खपीम बाप्शा “दुम्त हना, मुल दुम्चशो श्येत मदुम्ल” दे प्रार्थना पवा बाक्त। ३६मिनु “आब्बा, आं आफ, गे मारेइ मारेइ पने चाप्नीनी। एको कचौरा आं कली मतूपाइक्थु लतीने। तन्न आं दाक्शो मदुम्ल। इन दाक्शोन दुम्ल” दे प्रार्थना पशा, लेशशा जाक्माक्त। येसुम आइक्च आल खोदेशो पा, आ आफ कली आब्बा देंत। ३७लेशशा जाक्मेनु, सांफा आन कली इप्शो तामी बाक्त। मिनु पत्रुस कली “ए सिमोन, इमे? छिन का यो मइप्थु बाक्ने मचबी? मर्कूस १०:३८ ३८थुं थाम्चा पुंडसेनु, पाप मपड, दे मइप्थु बाक्शा प्रार्थना पावो। थुंमी पाइनुड, चाप्नुड देंब, तन्न रांमी फाल्ने मचाप्ब” दे मदा बाक्त। ३६मिनु लेंशा इक्का आइक्था लशा, डोंइती प्रार्थना पशो खोदेशो पा, प्रार्थना पवा बाक्त। ४०मिनु लेंशा लेशशा जाक्शा, निन्द्रामी दुक्शा बाक्शो तामी बाक्त। मेकोपुकीमी मार देंचा, दे मारेइ मतुइक्तमे बाक्त। ४१मिनु लेंशा प्रार्थना पथ लशा, लेशशा जाक्शा, मेको आन कली “गे मुल सम्म इप्शा बाक्नीनी? मुल गाप्त। रागीम जरमेशो पापी आन गुइमी गेचा पुंडसीचा चिक्ताक्व। ४२लो बोक्कीन, लय। आं कली ग्याइक्चा वारच पाइब जाक्चाप्तु” दे माइक्मी बाक्त।

येसु ग्याइक्चा पुंडसीशो

४३मो माइक्मीनु, आ शेंसीब यहूदामी ठेयब चढेब, सास्त्री नु जोक्ब तुइक्ब खाल्पापुकीमी सोइश्शो तरवार कोक्के कुरब हुल, येसु कली ग्याइक्थ चाक्गा बाक्त। ४४यहूदामी “सु कली पुक्पु पदु, मेको कली ग्याइश्शा लतीने” दे ग्याइक्थ जाक्ब आन कली तुइक्पाइश्शो

बाकमाक्त। ४५ मिनु जाकमानु, यहूदा येसु आ नेक्था लशा “रब्बी” दे बे मुप्शा, पुक्पु पवा बाक्त। *हिब्रू लोवमी ठेयब शेंब कली रब्बी देनीम।* ४६ मिनु ग्याइक्थ जाकबपुकीमी येसु कली ग्याइक्तमे बाक्त। ४७ मिनु येसु नु काथ बाक्ब कामी तरवार ग्रि शोइश्शा, ठेयब चढ़ेब आ वाइल का आ नोफा दि खोदा बाक्त। ४८ मिनु येसुमी आ कली ग्याइक्ब हुल आन कली “तरवार कोक्के कुरशा, खुइ पाइब कली ग्याइक्थ जाक्शो खोदेशो पा आं कली ग्याइक्थ जाक्नी? ४९ नाक्त कित कित परमप्रभु यावे आ खिंमी गेपुकी नु काथा बाक्शा, शेंना शेंन बाकडानु, मग्याइक्तीनी। तन्न परमप्रभु यावेमी ब्रेक्पाइश्शो लोव्र थमा दुम्चा कली ओदेशो दुम्त” दे माइक्मी बाक्त। ५० मिनु आ शेंसीबपुकी येसु कली थु था प्रोइशा, साव सुव ब्रशा प्रोकमा बाक्त। ५१ मिनु येसु कली ग्याइश्शा फ्रेंशा लदमेनु, ठिटा का आन नोले खोदा बाक्त। मेको ठिटांम वा का ला गिल्सीशो बाक्माक्त। ५२ मारदे हना मेको कली ग्याइक्तमेनु, आ फेक्शो वा प्रोइशा, शिशा प्रोकशो बाक्माक्त। *आमोस २:१६*

येसु कली चढ़ेब आ डोंइती चाक्शो

५३ मिनु येसु कली नेल्ल क्येडा ठेयब चढ़ेब आ डोंइती चाक्दीत्मे बाक्त। मेकेर ठेयब चढ़ेब, जोक्ब तुइक्ब खाल्पा नु सास्त्रीपुकी खुम्सीशा बाक्शो बाक्मा बाक्त। ५४ पत्रुस मेको आन नोनोले खोइश्शा लशा, नेल्ल क्येडा ठेयब चढ़ेब आ लाडगा जाक्दीम्माक्त। मेकेर सिपाइपुकी नु काथा मी थेरशा बाक्माक्त।

५५ ठेयब चढ़ेब नु मेकेर बाक्ब नेल्लेमी

मार पामे बाक्त देशा हना, जोल पा दोस गेशा, येसु कली साइक्पाइक्चा माल्मे बाक्त। तन्न दोस गेने मचाप्मे बाक्त। ५६ शुश मुरुमी जोल पा सांकछी गेमे बाक्त, तन्न आन लोव्र मगारमाक्त। ५७ सांकछी का निक्शी बोक्शा “एको ग्याइश्शो मुरुमी साबेर मार देशो नेंतक देशा हना ५८ ‘एको गुडमी सेल्शो परमप्रभु यावे आ खिं प्रेशशा, नाक्त सांमी अर्को सेल्नुड। मेको चहिं गुडमी सेल्शो ममाइ’ देशो नेंतक” देंमा बाक्त। *यूहन्ना २:१६-२१* ५९ मो देंमा बाक्त हना यो, आन लोव्र मगारमाक्त। ६० मिनु नेल्ल क्येडा ठेयब चढ़ेब बोक्शा, आन दातेमी राप्शा, येसु कली “एकोपुकीमी देशो लोव्र नेंशा, मार देंनेवे?” दे हिल्लो पवा बाक्त। *मर्कूस १५:५; यसेया ५३:७* ६१ मिनु येसु सिक्सी पा बाक्शा, लोव्र का यो मलेत्ता बाक्त। मिनु नेल्ल क्येडा ठेयब चढ़ेबमी “गे नेल्ल क्येडा मान ताइब परमप्रभु यावे आ तौ ख्रीस्त नवे?” दे हिल्लो पवानु, ६२ येसुमी “गो नड। गे रागीम जरमेशो कली नेल्ल सक्ति पाइश्शो आ ग्युरा गे बाक्शो ताइनीनी। गोस्सुमी गिल्सीशा जाक्ना जाक्न पशो ताइनीनी” दे मदा बाक्त। *भजन संग्रह ११०:१; दानीएल ७:१३-१४* ६३ मिनु नेल्ल क्येडा ठेयब चढ़ेबमी आंम आ फेक्शो वा खाक्शा “परमप्रभु यावे कली शुक्शी लोव्र पाइबाक्त। ६४ मार सांकछी माल्दा डा? आ शुक्शी पशो लोव्र गे नेल्लेमी नेंशा, सांकछी दुम्तीनी। एको कली मार पाइक्चा? मार देंनीनी?” दे माइक्मीनु, नेल्लेमी “साइक्चा माल्ब” देंमा बाक्त। *यूहन्ना १६:७* ६५ मिनु साइक्चा माल्ब देशा डा मिन, का निक्शीमी आ कुलम तोक्तमे बाक्त। का निक्शीमी आ मिक्च सुम्शा, तुप्शा “सुमी तुमे? लो देन”

दे शुक्शी पामे बाक्त। मिनु सिपाइ आन गुइमी गेमे बाक्त। मेकोपुकीमी तुप्ना तुप्न लदमे बाक्त।

पत्रुसम “मेको कली मतुइक्नुड” देशो

६६ आगाम मोदेशो दुम्मेनु, पत्रुस लाङ्गामी बाक्माक्त। मिनु गेय पाइब मीश मुर कामी जाक्शा, ६७ पत्रुस कली मी थेरशो तशा, शिरशा कोव्रशा “गे यो मेको नासरथ डा येसु नु काथा गाक्ब का बाक्डे बाक्त” देंमाक्त। ६८ मिनु पत्रुसमी “इ देशो मरुबु। मारेइ मतुइक्नु” देंमाक्त। मिनु गूशा, ठेयब लाप्चो डा लां जाक्दीम्माक्त। ६९ मिनु मेको गेय पाइब मीश मुरुमी पत्रुस कली लेंशा तशा, मेकेर बाक्ब आन कली “मेरे यो मेको नु गाक्ब का बाक्त” देंमेनु, ७० पत्रुसमी “गो मनड, मेको कली मतुइक्नुड” देंमाक्त। मिनु छिन का नोले मेकेर बाक्बपुकीमी यो “गे मेको नु काथा गाक्ब का बाक्डे बाक्त, मारदे हना गालील डा बाक्डे बाक्त, दे तुंडसीब” देंमानु, ७१ पत्रुसमी “जोल पाता हना, यावेमी सजाइ गेयील, इन देशो मुर कली तुंडसीन मतुइक्नुड” दे कसम जशा, आ लोव्र थोक्शा देंमाक्त। ७२ मो देंम चोटी भाले खेयप निक्शी ग्रीमाक्त। मिनु पत्रुसमी “भाले खेयप निक्शी मग्रीथु, खेयप सां सम्म मेको कली मतुइक्नुड, सु बाक्म? देंनेवे” दे येसुमी देशो लोव्र ति फ्रुक्गा बाक्त। मिनु आ पशो मिम्शा डाक्माक्त।

पिलातस आ डोंइती राप्पाइश्शो

१५ मिनु नां सोव्रमेनु, ठेयब चढेब, जोक्ब तुइक्ब खाल्पा नु सास्त्रीपुकी, सभाम बाक्ब नेल्ल खुम्सीशा,

सल्ला पामे बाक्त। मिनु येसु कली फ्रेंशा लाइश्शा, पिलातस आ गुइमी गेमे बाक्त। २ मिनु पिलातसमी येसु कली “गे यहूदी आन पिप नवे?” दे हिल्लो पवानु “गे आंमा देंतीनी” दे लोव्र लेत्ता बाक्त। ३ ठेयब चढेबपुकीमी शुश दोस गेमे बाक्त। ४ मिनु पिलातसमी येसु कली “इ कली शुश दोस गेम्तेक्मे। गे मेको आन कली मारेइ लोव्र मलेत्नेवे?” दे हिल्लो पवा बाक्त। ५ मिनु येसुमी लोव्र का यो मलेत्ता बाक्त। मिनु पिलातस छक लाक्माक्त।

मर्कूस १४:६१; यसेया ५३:७

६ पास्सा नाक्ती पिलातसमी मुरपुकीमी प्रॉइचा, दे पुंडशो जेल्खानमी चोक्सीशो मुर का कली प्रॉइबाक्माक्त। ७ सरकार कली मरिम्शो पा जेल्खानमी चोक्चा पुंडसीशो मुर आन दाते डा बारब्बा माइश्शो का बाक्माक्त। मेकोमी मुर साइश्शो बाक्माक्त। ८ मिनु मुरपुकीमी पिलातस कली “साइ रे डा पशो खोदेशो पा मुर का कली प्रोनीन” दे पुन्मे बाक्त। ९ मिनु पिलातसमी “यहूदी, इन पिप प्रॉइचा दे पुंडनी?” दे हिल्लो पवा बाक्त। १० मारदे हना ठेयब चढेबपुकीमी थुं चोशा, येसु कली ग्याइक्पदमे बाक्त दे रुप्शा, प्रॉइचा माल्शो बाक्माक्त। *यूहन्ना ११:४८* ११ तन्न ठेयब चढेबपुकीमी मुर आन कली हुल पोक्शा “मेको कली मप्रॉइचा, बारब्बा कली प्रॉइचा, सरकार” दे पुंडपदमे बाक्त। १२ मिनु पिलातसमी “गेपुकीमी यहूदी आन पिप देशो मुर कली मार पदु मिनु?” दे हिल्लो पवानु १३ “मेको कली शीमी क्येप्शा कांटी थोक्शा क्याइक्चा माल्ब” दे रेयके पचा गोव्रमे बाक्त। १४ मिनु पिलातसमी “मार मरिम्शो पवा, मार दोस गेचा” देंमेनु “शीमी क्येप्शा

कांटी थोकशा क्याइक्चा माल्ब” दे शुश रेयके पामे बाक्त। १५मिनु पिलातसमी “हुल आन दाक्शो पचा” दे मिम्शा, बारब्बा कली प्रॉइपदा बाक्त। येसु कली चहिं युक्पाइश्शा, शीमी क्येप्शा कांटी थोकशा क्याइक्चा कली सिपाइ आन गुइमी गेवा बाक्त।

येसु कली शीमी क्येप्शा क्याइश्शा

१६मिनु सिपाइपुकीमी येसु कली दरवार डा सिपाइ आन बाक्तीके चाक्दीश्शा, आन पल्टन नेल्ल खुप्शा डा मिन, १७आ फेक्शो वा पुइश्शा, पिप आन फेक्तीक रड पाइश्शा वा फेक्पाइश्शा, चू के सिरपेच सेल्शा, आ पियाम गुप्तमे बाक्त। १८मिनु “यहूदी आन पिप, सेउ ताक्कीन” दे सेउ पखु पामे बाक्त। १९मिनु रेक्के के कोक्केमी आ पिया तेत्मे बाक्त। आ कुल तोक्तमे बाक्त। मिनु आ डोंइती पोक्च थेक्शा बाप्शा, ठेयब सेल्लु पामे बाक्त। २०मिनु शुक्शी पचा रूशा, वा पुइश्शा, आंम आ वा फेक्पाइश्शा, गुंइशा, शीमी क्येप्शा कांटी थोकशा क्याइक्चा कली लदमे बाक्त।

२१मिनु लना लन बाक्मानु, आ गाउं रे पिशो साइरेनी डा सिमोन गुम्मे बाक्त। मेको सिमोन अलेकजन्डर नु रुफुस आस आफ बाक्माक्त। मेको कली गुम्शा, येसु कली क्येप्तीक शी “लो, कुर कि कुर” दे कुरपदमे बाक्त। रोमी १६:१३

२२मिनु येसु कली गोल्गथामी चाक्दीत्मे बाक्त। गोल्गथा कली खप्परे यो देंसीब। २३मिनु अडगुर शांबुमी मूरे माइश्शा तेल कुर पशो तूतीके गेमेनु, येसुमी तूने मबिस्से बाक्त। २४मिनु शीमी क्येप्शा कांटी थोकशा क्यदमे बाक्त। क्याइश्शा डा मिन,

सुमी ताइबा, दे तुइक्चा कली वा वोइश्शा फेन्टे आप्मे बाक्त। भजन संग्रह २२:१८ २५शीमी क्यदमेनु, सुनी डा ६ बजेशो बाक्माक्त। २६“यहूदी आन पिप” दे दोस गेशा, ब्रेक्शो ब्रेक्स यो क्येप्शो बाक्माक्त। २७खुइ निकशी आस कली यो का आ ग्युरा गे, का आ पेरा गे क्याइश्शा वोदमे बाक्त। २८मो पशोमी “मरिम्शो पाइब सुइश्शा, मरिम्शो पाइब नु काथा वोइक्चा पुंइसीब” दे परमप्रभु यावेमी ब्रेक्पाइश्शा लोव थमा दुम्माक्त। यसैया ५३:१२

२९मेकेर कोल्लब शुश मुर बाक्मा बाक्त। मेकोपुकीम आन पिया हिम्शा “परमप्रभु यावे आ खिं प्रेशशा, नाक्त सांमी नक सेल्लुड, देंते। खोइ मिनु, सेल्ले चबी? मर्कूस १४:५८ ३०शीमी क्येप्शो रे प्रॉइसीशा तोंइसो” दे शुक्शी पामे बाक्त। ३१ठेयब चढेब नु सास्त्रीपुकीमी यो शुक्शी पा “शुश मुर आन कली श्येत रे प्रॉइना प्रॉइन गाक्बाक्त, आंम कली चहिं प्रॉइसीने मचाप्बाक्त। ३२इस्त्राएल डा पिप, ख्रीस्तमी शीमी क्येप्शो रे प्रॉइसेक्ल। प्रॉइसीशो ताइतय हना, थमा सुइक्नय” देंमुमा बाक्त। आ ग्युरा नु पेरा गे वोइश्शा निकशीमी यो शुक्शी पदसे बाक्त। मती १६:१४

३३मिनु नाक्त १२ बजे नां जिक रिक्शा, ३ बजे सम्म रागी नेल्ल छिडछिड दुम्माक्त। ३४मिनु ३ बजे गे येसुमी “एली, एली, लामा असाब्थानी” दे वाइ ब्रेम्माक्त। आ देशो मार रुम्सीब देशा हना “आं परमप्रभु, आं परमप्रभु, मारदे प्रॉइयीनी?” देशो रुम्सीब। भजन संग्रह २२:२ ३५एर ओंथ बाक्बपुकीमी मो देशा वाइ ब्रेश्शा नेंशा “नेनीने, एलीया कली ब्रेत्ताक्व” देंमुमा बाक्त। ३६मिनु का

दोरशा लशा, रुवामी ग्युरशो तूचा थोवक नुप्शा, कोक्केमी लिक्शा युप्चा गेशा “एलीया जाक्शा, प्रोंडबा कों? लो, कोव्रय” देंमाक्त। ३७मिनु येसु लेंशा काले वाइ ब्रेशशा, नोले सोक्त कीशा बेक्माक्त। प्रस्थान २६:३१-३३; २इतिहास ३:१४ ३८मिनु बेक्म नोले मार दुम्माक्त देंशा हना, परमप्रभु यावे आ खिं आगा डा कोठामी बारेशो वा इर रे उइ सम्म उइक्थ पा जेर गाक्माक्त। ३९मिनु येसु आ डोंइती राप्शा बाक्शो कप्तानमी येसु वाइ ब्रेशशा, नोले सोक्त कीशा बेक्शो तशा “थमा पा, एको मुर परमप्रभु यावे आ तौ बाक्माक्त” देंमाक्त।

४०येसु बेक्मेनु, शुश मीश मुरपुकीमी डोन रे कोव्रशो बाक्मा बाक्त। मोदेंशो कोव्रब का माग्दाला डा मरीयम बाक्माक्त। का याकूब नु योसेस आस ममा मरीयम बाक्माक्त। का सालोमे बाक्माक्त। ४१मेकोपुकी गालील रे यरूसलेम सम्म काथ गाक्शा, येसु कली वारच पना पन बाक्शो बाक्मा बाक्त। अरु यो काथा गाक्शा, यरूसलेम जाक्दीशो बाक्मा बाक्त। लूका ८:२-३

येसु आ रां पुक्खीमी वोइशशो

४२येसु बेक्ची नाक्त चहिं नाइक्तीक नाक्त आ डोंइती नाक्त बाक्माक्त। मिनु नां रिक्मेनु, मार दुम्माक्त देंशा हना, ४३अरीमाथीया डा योसेफ माइशशो, सभामी बाक्ब आन दाते डा हिक्सीशो मुर का बाक्माक्त। मेको परमप्रभु यावे आ राज्य तांइसेक्ल, दे आस पा बाक्शो बाक्माक्त। मेको मुरुमी महिंथु, पिलातस कली गुम्थ लशा “येसु आ बेक्शो रां लाइक्चा गेयीनी” दे पुना

बाक्त। ४४मिनु पिलातसमी बेक्म कों? मबेक्म दे मारेइ मतुइक्थु कप्तान कली ब्रेशशा “मेको येसु माइशशो बेक्मे?” दे हिल्लो पवा बाक्त। ४५मिनु कप्तानमी “बेक्त” देंमेनु, लाइक्चा गेवा बाक्त। ४६मिनु योसेफमी बुश वा ग्याप्शा चाक्शा, येसु आ बेक्शो रां रे कांटी उइशशा शोलशा, बुश वामी गिल्शा लाइशशा, पुक्खी कामी ओइशा वोदा बाक्त। मेको पुक्खी बेक्शो मुर वोइक्चा कली फुल्लु मुशा, लाप्चो पाइशशो सेल्शा वोइशशो बाक्माक्त। मिनु बेक्शो मुर ओइशा वोइशशा, फुल्लुमी चोक्शा वोदा बाक्त। ४७मोपा वोइशशो माग्दाला डा मरीयम नु योसेस आ ममा मरीयममी ताम्से बाक्त।

येसु बेक्शो रे सेंसाक्व, दे नेंपाइशशो

मती २८:१-१०; लूका २४:१-१२;

यूहन्ना २०:१-१०

१६ मिनु नाइक्तीक नाक्त नोले माग्दाला डा मरीयम, याकूब आ ममा मरीयम नु सालोमेमी बेक्शो मुर आ रांम खेक्चा कली खेक्तीक ग्याप्मे बाक्त। २मिनु हप्ता डा डोंइती नाक्त सुनी कना बोक्शा, नां सोवमेनु, पुक्खी गे लमा बाक्त। ३मिनु लमा लमा “फुल्लु सुमी याक्शा गेबा?” देंमुमा बाक्त। ४मिनु जाक्दीशशा कोव्रडमेनु, फुल्लु याक्ने थुम्शो तामे बाक्त। मेको फुल्लु शुश ठेयब बाक्माक्त। ५मिनु पुक्खी ओव्रशा कोव्रडमेनु, बुश वा फेक्शो टिटा का ग्युरा गे निशशो तशा छक लाक्मा बाक्त। ६मिनु मेको टिटामी “मार छक लाक्नी? शीमी क्येप्शा कांटी थोक्शा क्याइशशो नासरथ डा येसु कली माल्थ

जाक्नी ममाइ? आ बेक्शो रां वोइक्तीके कोव्रडीन, मबाक्ब। बेक्शो रे सेंसाक्ब। ७ मुल लशा, पत्रुस, शेंसीब नेल्ल आन कली नु इन डोंइती तुइक्पाइश्शो खोदेशो पा, इन डोंइती गालील जाक्दीप्ब। मेकेर ग्रुम्चा ताइनीनी, दे शोव्रथ लने” दे माइक्मी बाक्त। मर्कूस १४:२८ ८ मिनु मीश मुरपुकी छक लाक्शा, हिंशा खिंखि पा फो फु गूशा प्रोकमा बाक्त। मिनु सुइ कली मारेइ मदेंमा बाक्त। मारदे हना क्युल हिंशो बाक्मा बाक्त।

येसुमी आंम कली तपांइसीशो

लूका २४:३६-४६; यूहन्ना २०:१६-२३

९ हप्ता डा डोंइती नाक्ती सुनी कना येसु बेक्शो रे सेंसीशा, ७ ओटा वोल गुंइचा पुंइसीशो माग्दाला डा मरीयम कली तपांइसे बाक्त। लूका ८:२; यूहन्ना २०:१-१८ १० मरीयममी येसु कली तशा, लशा, डोंइती येसु नु काथा गाक्ब मुल आन थुं खाइश्शा बाक्ब आन कली “गो येसु कली बेक्शो रे सेंसीशा ब्रोंइशो ताता” दे शोव्रडा बाक्त। ११ मेकोपुकीमी मरीयम आ लोव्र थमा मसुदमे बाक्त।

१२ नोले येसु कली थमा सुइक्ब निक्शी आस गाउं लसानु, लांमी येसुमी तपांइसे बाक्त। लूका २४:१३-३५ १३ मेको निक्शी फ्रा फ्रु लेशशा जाक्शा, अरु आन कली “येसु कली ताइतस्कु” देंसा बाक्त। मिनु मेको आस लोव्र यो थमा मसुदमे बाक्त।

१४ मिनु नोले आ शेंसीब ११ जनामी खमे जना जन बाक्मानु, येसुमी मेको आन कली तपांइसे बाक्त। मिनु “मुल सम्म रुप्चा थुं मपनी? मुल यो थमा

मसुइय्यीनी?” दे हुइक्तीमी बाक्त। मारदे हना “बेक्शो रे सेंसीशा ब्रोंइशो आंइ मिक्चीमी ताइतक” देंब आन लोव्र थमा मसुइश्शो बाक्मा बाक्त। १ कोरिन्थी १५:५

येसु आ नोले डा लोव्र

१५ मिनु येसुमी आ शेंसीब ११ जना आन कली “रागी नेल्ल हिरशा, ग्येरपाइक्ब लोव्र नेल्ल आन कली नेंपतीने। मर्कूस १३:१०; मत्ती २८:१६-२० १६ सुमी थमा सुइश्शा, ब्वाक्कुमी खुम्शा गुंइचा पुंइसीबा, मेको ब्रोंइचा ताइब। सुमी चहिं थमा मसुइक्बा, मेको सजाइ गेचा पुंइसीब। प्रेरित २:३८; प्रेरित १६:३१-३३ १७ थमा सुइक्बपुकी दोदेशो सक्ति पाइश्शो दुम्नीम देंशा हना, आं नें थिशा वोल आन कली गुंइशा खेरनीम। परमप्रभु यावे आ सोक्तीमी पपाइश्शो लोव्र ब्वाक्नीम। प्रेरित १६:१८; प्रेरित १०:४६; प्रेरित १६:६ १८ बुस्स ग्याइक्ताक्म हना यो, ओश्येर तूतेक्म हना यो, मेको आन कली मारेइ मदुम्ब। रोइ पाइब आन तारी गुइ चाक्शा प्रार्थना पामेनु, सानीम” दे माइक्मी बाक्त। लूका १०:१६; प्रेरित २८:३-६; याक्ब ५:१४-१५

१९ मेको लोव्र नेल्ल थुम्शा नोले प्रभु येसु स्वर्ग लाइक्चा पुंइसे बाक्त। मिनु परमप्रभु यावे आ ग्युरा गे निस्से बाक्त। प्रेरित १:२; भजन संग्रह ११०:१; प्रेरित ७:५५ २० मिनु येसु कली थमा सुइक्बपुकी लशा, ग्येरपाइक्ब लोव्र तेइ तेइ नेंपाइक्ना पाइक्न गाक्मा बाक्त। प्रभु यो मेकोपुकी नु काथा बाक्शा, चिन्ड कोइना कोइन मेको आन लोव्र थमा बाक्ब देंबाक्माक्त। प्रेरित १४:३; हिब्रू २:४